

隋書



南京國子監司業季道統 校

前監丞詹仰聖

監丞李之皞

博士趙世典

助教何詩

學正鄭倣

曾士科

陳一道

學錄王之機

石可大

典簿劉堅榮

典籍劉邦重同校

隋書目錄

特進臣魏徵上

帝紀五

志三十

列傳五十

帝紀第一卷

隋書一

帝紀

高祖上

第二卷

隋書二

萬曆二十二年刊

隋書目錄

帝紀

高祖下

第三卷

隋書三

帝紀

煬帝上

第四卷

隋書四

帝紀

煬帝下

第五卷

隋書五

帝紀

恭帝

志第一卷

隋書六

志

禮儀一

第二卷

隋書七

志

禮儀二

第三卷

隋書八

志

禮儀三

第四卷

志

禮儀四

第五卷

志

禮儀五

第六卷

隋書十一

志

禮儀六

第七卷

隋書十二

志

禮儀七

第八卷

隋書十三

志

音樂上

第九卷

隋書十四

志

音樂中

第十卷

隋書十五

志

音樂下

第十一卷

隋書十六

志

律曆上

第十二卷

隋書十七

志

律曆中

第十二卷

隋書十八

志

律曆下

第十四卷

隋書十九

志

天文上

第十五卷

隋書二十

志

天文中

第十六卷

隋書二十一

志

天文下

第十七卷

隋書二十二

志

五行上

第十八卷

隋書二十三

志

五行下

第十九卷

隋書二十四

志

食貨

第二十卷

隋書二十五

志

刑法

第二十一卷

隋書二十六

志

百官上

第二十二卷

隋書二十七

志

百官中

第二十三卷

隋書二十八

志

百官下

第二十四卷

隋書二十九

志

地理上

第二十五卷

隋書三十

志

地理中

第二十六卷

隋書三十一

志

地理下

第二十七卷

隋書三十二

志

經籍一經

第二十八卷

隋書三十三

志

經籍二史

第二十九卷

隋書三十四

志

經籍三子

第三十卷

隋書三十五

志

經籍四集

道經

佛經

列傳第一卷

隋書三十六

后妃傳

文獻獨孤皇后

宣華夫人陳氏

容華夫人蔡氏

煬帝蕭皇后

第二卷

隋書三十七

列傳

李穆

子渾

穆兄子詢

詢弟崇

崇子敏

梁睿

第三卷

隋書三十八

列傳

劉昉

鄭譯

柳裘

皇甫績

韋暮

盧賁

第四卷

隋書三十九

列傳

于義

子宣道

宣敏

陰壽

子世師

骨儀附

竇榮定

元景山

源雄

豆盧勳

子毓

勳兄通

賀若誼

第五卷

隋書四十

梁士彥

子剛

宇文忻

王誼

元諧

王世積

虞慶則

元胄

第六卷

隋書四十一

列傳

高頴

蘇威 子夔

第七卷

隋書四十二

列傳

李德林

第八卷

隋書四十三

列傳

河間王弘 子慶 楊處綱

楊子崇

觀德王雄 弟達

第九卷

隋書四十四

列傳

滕穆王瓚 嗣王綸 道悼王靜

衛昭王爽 嗣王集 蔡王智積

第十卷

隋書四十五

文四子傳

房陵王勇 子儼 秦孝王俊 子浩

庶人秀 庶人諒

第十一卷

隋書四十六

列傳

趙暎

趙芬

楊尚希

長孫平

元暉

韋師

楊昇

蘇孝慈 兄子沙羅

李雄

張暎

第十二卷

列傳

隋書四十七

列傳

韋世康

弟洸

藝冲

從父弟壽

柳機

子述 機弟旦

肅 從兄雄

亮

第十三卷

隋書四十八

列傳

楊素

弟約

從父文思

文紀

第十四卷

隋書四十九

列傳

牛弘

第十五卷

隋書五十一

列傳

宇文慶

李禮成

元孝矩 弟褒

郭榮

龐晃

李安

第十六卷

隋書五十二

列傳

長孫覽 從子熾

熾弟晟

第十七卷

隋書五十三

列傳

韓擒虎 弟僧壽

洪

賀若弼

第十八卷

隋書五十四

列傳

達奚長儒

賀婁子幹

史萬歲

劉方

第十九卷

隋書五十五

列傳

王長述

李衍

伊婁謙

田仁恭

元亨

杜整

李徹

崔彭

第二十卷

隋書五十五

列傳

杜彥

高勵

余朱敞

周搖

獨孤諧

乞伏慧

張威

和洪

侯莫陳穎

第二十一卷

隋書五十六

列傳

盧愷

令狐熙

薛胄

宇文弼

張衡

楊汪

第二十二卷

隋書五十七

列傳

盧師道

從父兄昌衡

李元操

薛道衡

從弟孺

第二十三卷

隋書五十八

列傳

明克讓

魏澹

陸爽

侯白

杜臺卿

辛德源

柳詵

許善心

李文博

第二十四卷

隋書五十九

煬三子傳

元德太子昭

齊王暕

趙王杲

第二十五卷

隋書六十

列傳

崔仲方

于仲文

兄顗 從父弟

段文振

第二十六卷

隋書六十一

列傳

宇文述

郭衍

第二十七卷

隋書六十二

列傳

王韶

元巖

劉行本

梁毗

柳彧

趙綽

裴肅

第二十八卷

隋書六十三

列傳

樊子蓋

史祥

元壽

楊義臣

衛玄

劉權

第二十九卷

隋書六十四

列傳

李圓通

陳茂

張定和

張大淵

麥鐵杖

沈光

來護兒

魚俱羅

陳稜

王辯

斛斯萬善

第三十卷

隋書六十五

列傳

周羅暉

周灋尚

李景

慕容三藏

薛世雄

王仁恭

權武

吐萬緒

董純

趙才

第三十一卷

隋書六十六

列傳

李諤

鮑宏

裴政

柳莊

源師

郎茂

高構

張虔威

榮毗

陸知命

房彥謙

第三十二卷

隋書六十七

列傳

虞世基

裴蘊

裴矩

第三十三卷

隋書六十八

列傳

宇文愷

閻毗

何稠

第二十四卷

隋書六十九

列傳

王劭

袁充

第二十五卷

隋書七十

列傳

楊玄感

李子雄
斛斯政

趙元淑
劉元振

李密

裴仁基

第三十六卷

隋書七十一

誠節傳

劉弘

皇甫誕

陶謨
敬釗

游元

馮慈明

張須陁

楊善會

獨孤盛

元文都

盧楚

劉子翊

堯君素

陳孝意

張季珣

松贊

第三十七卷

隋書七十二

孝義傳

陸彥師

田德懋

薛睿

王頌

楊慶

郭雋

田翼

紐回

劉仕雋

郎方貴

翟普林

李德饒

華秋

徐孝肅

第三十八卷

隋書七十三

循吏傳

梁彥光

樊叔略

趙軌

房恭懿

公孫景茂

辛公義

柳儉

郭絢
敬肅

劉曠

王伽

魏德

第三十九卷

隋書七十四

酷吏傳

庫狄士文

田式

燕榮

趙仲卿

崔弘度

弟弘昇元弘嗣

王文同

第四十卷

隋書七十五

儒林傳

元善

辛彥之

何妥

蕭該 包愷

房暉遠

馬光

劉焯

劉炫

褚暉 張冲

顧彪 王孝籍

魯世遠

第四十一卷

隋書七十六

文學傳

劉臻

王頰

崔儼

諸葛穎

孫萬壽

王貞

虞綽

王胄

庾自直

潘徽

杜正玄

弟正藏

第四十二卷

隋書七十七

隱逸傳

李士謙

崔廓

徐則

張文詡

第四十三卷

隋書七十八

藝術傳

庾季才

子質

盧太翼

耿詢

韋鼎

來和

蕭吉

楊伯醜

臨孝恭

劉祐

張胄玄

許智藏

萬寶常

第四十四卷

隋書七十九

外戚傳

獨孤羅

弟佗

蕭歸

子琮

琮弟瓌

第四十五卷

隋書八十

列女傳

蘭陵公主

南陽公主

襄城王妃

華陽王妃

譙國夫人

鄭善果母

孝女王舜

韓覬妻

陸襄母

劉昶女

鍾士雄母

孝婦覃氏

元務光母

裴倫妻

趙元楷妻

第四十六卷

隋書八十一

東夷傳

高麗

百濟

新羅

靺鞨

流求

倭國

第四十七卷

隋書八十二

南蠻傳

林邑

赤土

真臘

婆利

第四十八卷

隋書八十三

西域傳

吐谷渾

党項

高昌

康國

安國

石國

女國

焉耆

龜茲

踈勒

于闐

鏹汗

吐火羅

挹恒國

米國

史國

曹國

何國

烏那曷

穆國

波斯

漕國

附國

第四十九卷

隋書八十四

北狄傳

突厥

西突厥

鐵勒

奚

契丹

靺鞨

室韋

第五十卷

隋書八十五

列傳

宇文化及

弟智及

司馬德戡

裴虔通

王充

段達

隋書目錄

畢

帝紀第一

隋書一

特進

臣魏

徵

上

大明南京國子監司業季道統

校閱

高祖上

高祖文皇帝姓楊氏諱堅弘農郡華陰人也漢太尉震八代孫鉉仕燕為北平太守鉉生元壽後魏代為武川鎮司馬子孫因家焉元壽生太原太守惠嘏嘏生平原太守烈烈生寧遠將軍

禎禎生忠忠即皇考也皇考從周太祖起義關西賜姓普六茹氏位至柱國大司空隋國公薨贈太保謚曰桓皇妣呂氏以大統七年六月癸丑夜生高祖於馮翊般若寺紫氣充庭有尼來自河東謂皇妣曰此兒所從來甚異不可於俗間處之尼將高祖舍於別館躬自撫養皇妣嘗抱高祖忽見頭上角出褊體鱗起皇妣大駭墜高祖於地尼自外入見曰已驚我兒致令晚得天下爲人龍顏額上有五柱入頂目光外射有

文在手曰王長上短下沈深嚴重初入太學雖至親昵不敢狎也年十四京兆尹薛善辟爲功曹十五以太祖勲授散騎常侍車騎大將軍儀同三司封成紀縣公十六遷驃騎大將軍加開府周太祖見而歎曰此兒風骨不似代間人明帝即位授右小宮伯進封大興郡公帝嘗遣善相者趙昭視之昭詭對曰不過作柱國耳旣而陰謂高祖曰公當爲天下君必大誅殺而後定善記鄙言武帝即位遷左小宮伯出爲隋州刺

史進位大將軍後徵還遇皇妣寢疾三年晝夜不離左右代稱純孝宇文護執政尤忌高祖屢將害焉大將軍侯伏侯壽等匡護得免其後襲爵隋國公武帝娉高祖長女爲皇太子妃益加禮重齊王憲言於帝曰普六茹堅相貌非常臣每見之不覺自失恐非人下請早除之帝曰此止可爲將耳內史王軌驟言於帝曰皇太子非社稷主普六茹堅貌有反相帝不悅曰必天命有在將若之何高祖甚懼深自晦匿建德中率

水軍三萬破齊師於河橋明年從帝平齊進位柱國宇文憲破齊任城王高潛於冀州除定州總管先是定州城西門久閉不行齊文宣帝時或請開之以便行路帝不許曰當有聖人來啓之及高祖至而開焉莫不驚異尋轉亳州總管宣帝即位以后父徵拜上柱國大司馬大象初遷大後丞右司武俄轉大前疑每巡幸恒委居守時帝爲刑經聖制其法深刻高祖以法令滋章非興化之道切諫不納高祖位望益隆帝頗

以爲忌帝有四幸姬並爲皇后諸家爭寵數相
毀譖帝每忿怒謂后曰必族滅爾家因召高祖
命左右曰若色動即殺之高祖旣至容色自若
乃止大象二年五月以高祖爲揚州總管將發
暴有足疾不果行乙未帝崩時靜帝幼冲未能
親理政事內史上大夫鄭譯御正大夫劉昉以
高祖皇后之父衆望所歸遂矯詔引高祖入總
朝政都督內外諸軍事周氏諸王在藩者高祖
悉恐其生變稱趙王招將嫁女於突厥爲詞以

徵之丁未發喪庚戌周帝拜高祖假黃鉞左大
丞相百官總已而聽焉以正陽宮爲丞相府以
鄭譯爲長史劉昉爲司馬具置寮佐宣帝時刑
政苛酷羣心崩駭莫有固志至是高祖大崇惠
政法令清簡躬履節儉天下悅之六月趙王招
陳王純越王達代王盛滕王道並至于長安相
州總管尉遲迥自以重臣宿將志不能平遂舉
兵東夏趙魏之士從者若流旬日之間衆至十
餘萬又宇文胄以滎州石碁以建州席毗以沛

郡毗弟義羅以兗州皆應於迴迴遣子質於陳請援高祖命上柱國鄖國公韋孝寬討之雍州牧畢王賢及趙陳等五王以天下之望歸於高祖因謀作亂高祖執賢斬之寢趙王等之罪因詔五王劔履上殿入朝不趨用安其心七月陳將陳紀蕭摩訶等寇廣陵吳州總管于顛轉擊破之廣陵人杜喬生聚衆反刺史元義討平之韋孝寬破尉遲迴於相州傳首闕下餘黨悉平初迴之亂也鄖州總管司馬消難據州響應淮

南州縣多同之命襄州總管王誼討之消難奔陳荆郢羣蠻乘釁作亂命亳州總管賀若誼討平之先是上柱國王謙爲益州總管旣見幼主在位政由高祖遂起巴蜀之衆以匡復爲辭高祖方以東夏山南爲事未遑致討謙進兵屯劔閣陷始州至是乃命行軍元帥上柱國梁睿討平之傳首闕下巴蜀阻險人好爲亂於是更開平道毀劔閣之路立銘垂誡焉五王陰謀滋甚高祖齎酒肴以造趙王第欲觀所爲趙王伏甲

以宴高祖高祖幾危賴元胄以濟語在胄傳於是誅趙王招越王盛九月以世子勇爲洛州總管東京小冢宰壬子周帝詔曰假黃鉞使持節左大丞相都督內外諸軍事上柱國大冢宰隋國公堅感山河之靈應星辰之氣道高雅俗德協幽顯釋巾登仕摺紳傾屬開物成務朝野成風受詔先皇弼諧寡薄合天地而生萬物順陰陽而撫四夷近者內有艱虛外聞妖寇以鷹鷂之志運帷帳之謀行兩觀之誅掃萬里之外遐

邇清肅實所賴焉四海之廣百官之富俱稟大訓咸餐至道治定功成棟梁斯託神猷盛德莫二於時可授大丞相罷左右丞相之官餘如故冬十月壬申詔贈高祖曾祖烈爲柱國太保都督徐兗等十州諸軍事徐州刺史隋國公謚曰康祖禎爲柱國太傅都督蒲陝等十三州諸軍事同州刺史隋國公謚曰獻考忠爲上柱國太師大冢宰都督冀定等十三州諸軍事雍州牧誅陳王純癸酉上柱國鄭國公韋孝寬卒十一

月辛未誅代王達滕王道十二月甲子周帝詔曰天大地大合其德者聖人一陰一陽調其氣者上宰所以降神載挺陶鑄羣生代蒼蒼之工成巍巍之業假黃鉞使持節大丞相都督內外諸軍事上柱國大冢宰隋國公應百代之期當千齡之運家隆台鼎之盛門有翊贊之勤心同伊尹必致堯舜情類孔丘憲章文武爰初入仕風流映世公卿仰其軌物搢紳謂爲師表入處禁闈出居藩政芳猷茂績問望彌遠往平東夏人情未安燕南趙北實爲天府擁節杖旄任當連率柔之以德導之以禮畏之若神仰之若日芳風美迹歌頌獨存淮海榛蕪多歷年代作鎮南鄙選衆惟賢威震殊俗化行黔首任掌鈎陳職司邦政國之大事朝寄更深鑾駕巡遊留臺務廣周公陝西之任僅可爲倫漢臣關內之重未足相况及天崩地坼先帝升遐朕以眇年奄經荼毒親受顧命保乂皇家姦人乘隙潛圖宗社無君之意已成竊發之期有日英規潛運大

略川迴匡國庇人罪人斯得兩河溝亂三魏稱
兵半天之下洶洶鼎沸祖宗之基已慮生人之
命將怠安陸作釁南通吳越蜂飛蠆聚江漢騷
然巴蜀鴟張翻將問鼎秦塗更阻漢門重閉畫
籌帷帳建出師車諸將稟其謀壯士感其義不
違時日咸得清蕩九功遠被七德允諧百僚師
師四門穆穆光景照臨之地風雲去來之所允
武允文幽明同德驟山驟水遐邇歸心使朕繼
踵上皇無爲以治聲高宇宙道格天壤伊尹輔

殷霍光助漢方之茂如也昔營丘曲阜地多諸
國重耳小白錫用殊禮蕭何優贊拜之儀番君
越公侯之爵姬劉以降代有令謨宜崇典禮憲
章自昔可授相國總百揆去都督內外諸軍事
大冢宰之號進公爵爲王以隋州之崇業鄆州
之安陸城陽溫州之宜人應州之平靖上明順
州之淮南士州之永川昌州之廣昌安昌申州
之義陽淮安息州之新蔡建安豫州之汝南臨
潁廣寧初安蔡州之蔡陽郢州之漢東二十郡

隋書卷一
爲隋國劔履上殿入朝不趨贊拜不名備九錫之禮加璽綬遠遊冠相國印綠綬綬位在諸侯王上隋國置丞相已下一依舊式高祖再讓不許乃受王爵十郡而已詔進皇祖考爵並爲王夫人爲王妃辛巳司馬消難以陳師寇江州刺史成休寧擊却之大定元年春二月壬子令日已前賜姓皆復其舊是日周帝詔曰伊周作輔不辭殊禮之錫桓文爲霸允應異物之典所以表格天之勲彰不代之業相國隋王前加典策

式昭大禮固守謙光絲言未綽宜申顯命一如徃旨王功必先人賞存後已退讓爲本誠乖朕意宜命百辟盡詣王宮衆心克感必令允納如有表奏勿復以聞癸丑文武百官詣閭敦勸高祖乃受甲寅策曰咨爾假黃鉞使持節大丞相都督內外諸軍事上柱國大冢宰隋王天覆地載藉人事以財成日徃月來由王道而盈具五氣陶鑄萬物流形誰代上玄之工斯則大聖而已曰惟先正翊亮皇朝種德積善載誕上相精

采不代風骨異人匡國濟時除凶撥亂百神奉
職萬國宅心殷相以先知悟人周輔乃弘道於
代方斯蔑如也今將授王典禮其敬聽朕命朕
以不德早承丕緒上靈降禍夙遭愍凶妖醜覲
覲密圖社稷宮省之內疑慮驚心公受命先皇
志在匡弼輯諧內外潛運機衡姦人懾憚謀用
丕顯俾贅旒之危爲太山之固是公重造皇室
作霸之基也伊我祖考之代任寄已深入掌禁
兵外司藩政文經武畧久播朝野戎軒大舉長

驅晉魏平陽震熊羆之勢冀部耀貔豹之威初
平東夏人情未一叢臺之北易水之南西距井
陘東至滄海比數千里舉袂如帷委以連城建
旌杖節教因其俗刑用經典如泥從印猶草隨
風此又公之功也吳越不賓多歷年代淮海之
外時非國有爰整其旅出鎮於亳武以威物文
以懷遠羣盜自奔外戶不閉人黎慕義襁負而
歸自北之風化行南國此又公之功也宣帝御
寓任重宗臣入典八屯外司九伐禁衛勤巡警

之務治兵得蒐狩之禮此又公之功也鑾駕遊
幸頻委留臺文武注意軍國諮稟萬事成理反
顧無憂此又公之功也朕在諒闇公實總已磐
石之宗姦回者衆招引無賴連結羣小往者國
哀甫爾已創陰謀積惡數旬昆吾方稔泣誅罄
甸宗廟以寧此又公之功也尉迴猖狂稱兵鄴
邑欲長戟而指北闕強弩而圍南斗憑陵三魏
之間震驚九州之半聚徒百萬悉成蛇豕淇水
洹水一飲而竭人之死生翻繫凶豎壽之長短

不由司命公乃戒彼鷹揚出車練卒誓蒼兕於
河朔建瓴水於東山口授兵書手畫行陣量敵
制勝指日尅期諸將遵其成旨壯士感其大義
輕死忘生轉鬪千里旗鼓奮發如火燎毛玄黃
變漳河之水京觀比爵臺之峻百 氛祲一旦
廓清此又公之功也青土連率跨據東秦藉負
海之饒倚連山之險望三輔而將逐鹿指六國
而願連雞風雨之兵助鬼爲虐本根旣拔枝葉
自殞屈法申恩示以大信此又公之功也申部

殘賊充斥一隅蠅飛蟻聚攻州略地播以玄澤
迷更知反服而捨之無費遺鏃此又公之功也
宇文胄親則宗枝外藩巖邑影響鄴賊有同就
燥迫脅吏人叛換城戍偏師討賊遂入網羅東
之武牢有同囹圄事窮將軍如伏國刑此又公
之功也檀讓席毗擁衆河外陳韓梁鄭宋衛鄒
魯村落成梟獍之墟人庶爲豺狼之餌強以陵
弱大則吞小城有書閉巷無行人授律出師隨
機掃定讓旣授首毗亦梟懸此又公之功也司

馬消難與國親姻作鎮安陸性多嗜欲意好貪
聚屬城子女劫掠靡餘部入貨財多少具罄擅
誅刺舉之使專殺儀台之臣懼罪畏威動而內
曩蠶食郡縣鳩毒華夷聞有王師自投南裔帝
唐崇山之罰僅可方此大漢流禦之刑是亦相
匹逋逃入藪荆郢用安此又公之功也王謙在
蜀翻爲厲階閉劔閣之門塞靈關之宇自謂五
丁復起萬夫莫向分闡推轂嘗不踰時風馳席
卷一舉大定擒斬兇惡掃地無遺此又公之功

也陳頊因循僞業自擅金陵屢遣醜徒赳赳江
北公指麾藩鎮無不摧殄方置文深之柱非止
尉佗之拜此又公之功也公有濟天下之勤重
之以明德始於辟命屈已登庸素業清徽聲掩
廊廟雄規神略氣蓋朝野序百揆而穆四門恥
一匡之舉九合尊賢崇德尚齒貴功錄舊旌善
興亡繼絕寬猛相濟彝倫攸叙敦睦帝親崇獎
王室星象不拆陰陽自調玄冥祝融如奉太公
之召雨師風伯似應成王之宰祥風嘉氣觸石

搖林瑞獸異禽遊園鳴閣至功至德可大可久
盡品物之和究杳冥之極朕又聞之昔者明王
設官胙土營丘四履得征五侯參墟寵章異其
禮物故藩屏作固垂拱責成沉嘿巖廊不下堂
席公道高往烈賞薄前王朕以眇身託于兆人
之上求諸故實甚用懼焉往加大典憲章在昔
謙以自牧未應朝禮日月不居便已隔歲時談
物議其謂朕何今進授相國總百揆以申州之
義陽等二十郡爲隋國今命使持節太傅上柱

國祀國公椿大宗伯大將軍金城公趙昺授相
國印綬相國禮絕百辟任摠群官舊職常典宜
與事革昔堯臣太尉舜佐司空姬旦相周霍光
輔漢不居藩國唯在天朝其以相國總百揆去
衆號焉上所假節大丞相大冢宰印綬又加九
錫其敬聽朕後命以公執律脩德慎獄恤刑爲
其訓範人無異志是用錫公大輅戎輅各一玄
牡二駟公勤心地利所保人天崇本務農公私
殷阜是用錫公衮冕之服赤舄副焉公樂以移

風雅以變俗遐邇胥悅天地感和是用錫公軒
懸之樂六佾之舞公仁風德教覃及海隅荒忽
幽遐回首內向是用錫公朱戶以居公水鏡人
倫銓衡庶職能官流詠遺賢必舉是用錫公納
陛以登公執釣於內正性率下犯義無禮罔不
屏黜是用錫公虎賁之士三百人公元本闕是
用錫公鈇鉞各一公威嚴夏日精厲秋霜猾夏
必誅顧眄天壤掃清姦宄折衝無外是用錫公
彤弓一彤矢百盧弓十盧矢千惟公孝通神明

肅恭祀典尊嚴如在情切幽明是用錫公秬鬯
一卣珪瓚副焉隋國置丞相以下一遵舊式往
欽哉其敬循往策祗服大典簡恤爾庶功對揚
我太祖之休命於是建臺置官景辰詔王冕十
有二旒建天子旌旗出警入蹕乘金根車駕六
馬備五時副車置旄頭雲罕樂舞八佾設鐘虞
宮懸王妃爲王后長子爲太子前後三讓乃受
俄而周帝以衆望有歸乃下詔曰元氣肇闢樹
之以君有命不怕所輔惟德天心人事選賢與

能盡四海而樂推非一人而獨有周德將盡妖
孽遞生骨肉多虞藩維構釁影響同惡過半區
宇或小或大圖帝圖王則我祖宗之業不絕如
線相國隋王叡聖自天英華獨秀刑法與禮儀
同運文德共武功俱遠愛萬物其如已任兆庶
以爲憂手運機衡躬命將士芟夷姦宄刷蕩氛
侵化通冠帶威震幽遐虞舜之大功二十未足
相比姬發之合位三五豈可足論况木行已謝
火運旣興河洛出革命之符星辰表代終之象

煙雲改色笙簧變音獄訟咸歸謳歌盡至且天地合德日月貞明故以稱大爲王照臨下土朕雖寡昧未達變通幽顯之情皎然易識今便祇順天命出遜別宮禪位於隋一依唐虞漢魏故事高祖三讓不許遣兼太傅上柱國杞國公椿奉冊曰咨爾相國隋王粵若上古之初爰啓清濁降符授聖爲天下君事上帝而理兆人和百靈而利萬物非以區寓之富未以宸極爲尊大庭軒轅以前驪連赫胥之日咸以無爲無欲不

將不迎遐哉其詳不可聞已厥有載籍遺文可觀聖莫逾於堯美未過於舜堯得太尉已作運衡之篇舜遇司空便叙精華之竭彼褰裳脫屣貳宮設饗百辟歸禹若帝之初斯蓋上則天時不敢不授下祇天命不可不受湯代於夏武革於殷干戈揖讓雖復異揆應天順人其道靡異自漢迄晉有魏至周天曆逐獄訟之歸神鼎隨謳歌之去道高者稱帝祿盡者不王與夫文祖神宗無以別也周德將盡禍難頻興宗戚姦回

咸將竊發顧瞻宮闕將圖宗社藩維連率逆亂
相尋搖蕩三方不合如礪蛇行鳥攫投足無所
王受天明命睿德在躬救頽運之艱匡墜地之
業拯大川之溺撲燎原之火除羣凶於城社廓
妖氛於遠服至德合於造化神用洽於天壤八
極九野萬方四裔圓首方足罔不樂推徃歲長
星夜掃經天晝見八風比夏后之作五緯同漢
帝之聚除舊之徵昭然在上近者赤雀降祉玄
龜效靈鍾石變音蛟魚出穴布新之貺煥焉在

下九區歸徃百靈協贊人神屬望我不獨知仰
祇皇靈俯順人願今敬以帝位禪於爾躬天祚
告窮天祿永終於戲王宜允執厥和儀刑典訓
升圓丘而敬蒼昊御皇極而撫黔黎副率土之
心恢無疆之祚可不盛歟遣大宗伯大將軍金
城公趙昺奉皇帝璽紱百官勸進高祖乃受焉
開皇元年二月甲子上自相府常服入宮備禮
即皇帝位於臨光殿設壇於南郊遣使柴燎告
天是日告廟大赦改元京師慶雲見易周氏官

儀依漢魏之舊以柱國相國司馬渤海郡公高
頰爲尚書左僕射兼納言相國司錄沁源縣公
虞慶則爲內史監兼吏部尚書相國內郎咸安
縣男李德林爲內史令上開府漢安縣公韋世
康爲禮部尚書上開府義寧縣公元暉爲都官
尚書開府民部尚書昌國縣公元巖爲兵部尚
書上儀同司宗長孫毗爲工部尚書上儀同司
會楊尚希爲度支尚書上柱國雍州牧邗國公
楊惠爲左衛大將軍乙丑追尊皇考爲武元皇

帝廟號太祖皇妣爲元明皇后遣八使巡省風
俗景寅修廟社立王后獨孤氏爲皇后王太子
勇爲皇太子丁卯以大將軍金城郡公趙襲爲
尚書右僕射上開府濟陽侯伊婁彥恭爲左武
候大將軍己巳以周帝爲介國公邑五千戶爲
隋室賓旌旗車服禮樂一如其舊上書不爲表
荅表不稱詔周氏諸王盡降爲公辛未以皇弟
同安郡公爽爲雍州牧乙亥封皇弟邵國公慧
爲滕王同安公爽爲衛王皇子鴈門公廣爲晉

王俊爲秦王秀爲越王諒爲漢王以上柱國并州總管申國公李穆爲太師上柱國鄧國公竇熾爲太傅上柱國幽州總管任國公于翼爲太尉觀國公田仁恭爲太子太師武德郡公柳敏爲太子太保濟南郡公孫恕爲太子少傅開府蘇威爲太子少保丁丑以晉王廣爲并州總管以陳留郡公楊智積爲察王興城郡公楊靜爲道王戊寅以官牛五千頭分賜貧人三月辛巳高平獲赤雀太原獲蒼烏長安獲白雀各一宣

仁門槐樹連理衆枝內附壬午白狼國獻方物甲申太白晝見乙酉又晝見以上柱國元景山爲安州總管丁亥詔犬馬器玩口味不得獻上戊子弛山澤之禁以上開府當亭縣公賀若弼爲楚州總管和州刺史新義縣公韓擒爲廬州總管己丑蓋屋縣獻連理樹植之宮庭辛卯以上柱國神武郡公竇毅爲定州總管戊戌以太子少保蘇威兼納言吏部尚書餘官如故庚子詔曰自古帝王受終革代建侯錫爵多與運遷

附書紀卷一
朕應錄受圖君臨海內載懷沿革事有不同然則前帝後王俱在兼濟立功立事爵賞仍行苟利於時其致一揆何謂物我之異無計今古之殊其前代品爵悉可依舊丁未梁主蕭巖使其太宰蕭巖司空劉毅來賀四月辛巳大赦壬午太白歲星晝見戌戌太常散樂並放爲百姓禁雜樂百戲辛丑陳散騎常侍韋鼎兼通直散騎常侍王瑳來聘于周至而上巳受禪致之介國是月發稽胡修築長城二旬而罷五月戊子封

邗國公楊雄爲廣平王永康郡公楊弘爲河間王辛未介國公薨上舉哀於朝堂以其族人洛嗣焉六月癸未詔以初受天命赤雀降祥五德相生赤爲火色其郊及社廟衣服冕之儀如朝會之服旗幟犧牲盡令尚赤戎服以黃秋七月乙卯上始服黃百寮畢賀庚午靺鞨酋長貢方物八月壬午廢東京官突厥阿波可汗遣使貢方物甲午遣行軍元帥樂安公元諧擊吐谷渾於青海破而降之九月戊申戰亡之家遣使賑

附錄卷一
給庚午陳將周羅暉攻陷胡墅蕭摩訶寇江北
辛未以越王秀爲益州總管改封爲蜀王壬申
以上柱國薛國公長孫覽上柱國宋安公元景
山並爲行軍元帥以伐陳仍命尚書左僕射高
頴節度諸軍突厥沙鉢略可汗遣使貢方物是
月行五銖錢冬十月乙酉百濟王扶餘昌遣使
來賀授昌上開府儀同三司帶方郡公戊子行
新律壬辰行幸岐州十一月乙卯以永昌郡公
竇榮定爲右武侯大將軍丁卯遣兼散騎侍郎

鄭撫使於陳己巳有流星聲如墮牆光燭于地
十二月戊寅以申州刺史爾朱敞爲金州總管
甲申以禮部尚書韋世康爲吏部尚書己丑以
柱國元袞爲廓州總管興執郡公衛玄爲淮州
總管庚子至自岐州壬寅高麗王高陽遣使朝
貢授陽大將軍遼東郡公太子太保柳敏卒
二年春正月癸丑幸上柱國王誼第庚申幸安
成長公主第陳宣帝殂子叔寶立辛酉置河北
道行臺尚書省於并州以晉王廣爲尚書令置

河南道行臺尚書省於洛州以秦王俊爲尚書
令置西南道行臺尚書省於益州以蜀王秀爲
尚書令戊辰陳遣使請和歸我胡墅辛未高麗
百濟並遣使貢方物甲戌詔舉賢良二月己丑
詔高頴等班師庚寅以晉王廣爲左武衛大將
軍秦王俊爲右武衛大將軍餘官並如故辛卯
幸趙國公獨孤陀第庚子京師雨土三月戊申
開渠引杜陽水於三時原四月丁丑以寧州刺
史竇榮定爲左武侯大將軍庚寅大將軍韓僧

壽破突厥於雞頭山上柱國李充破突厥於河
北山五月戊申以上柱國開府長孫平爲度支
尚書己酉早上親省囚徒其日大雨己未高寶
寧寇平州突厥入長城庚申以豫州刺史皇甫
績爲都官尚書壬戌太尉任國公于翼薨甲子
改傳國璽曰受命璽六月壬午以太府卿蘇孝
慈爲兵部尚書雍州牧衛王爽爲原州總管甲
申使使弔於陳國乙酉上柱國李充破突厥於
馬邑戊子以上柱國叱李長義爲蘭州總管辛

卯以上開府爾朱敞爲徐州總管景申詔曰朕
祇奉上玄君臨萬國屬生人之敝處前代之宮
常以爲作之者勞居之者逸改創之事志未遑
也而王公大臣陳謀獻策咸云義農以降至于
姬劉有當代而屢遷無革命而不徙曹馬之後
時見因循乃末代之宴安非往聖之宏義此城
從漢彫殘日久屢爲戰場舊經喪亂今之宮室
事近權宜又非謀筮從之龜瞻星揆日不足建皇
王之邑合大衆所聚論變通之數具幽顯之情

同心固請詞情深切然則京師百官之府四海
歸向非朕一人之所獨有苟利於物其可違乎
且殷之五遷恐人盡死是則以吉凶之土制長
短之命謀新去故如農望秋雖暫劬勞其究安
宅今區宇寧一陰陽順序安安以遷勿懷胥怨
龍首山川原秀麗卉物滋阜卜食相土宜建都
邑定鼎之基永固無窮之業在斯公私府宅規
模遠近營構資費隨事條奏仍詔左僕射高頴
將作大匠劉龍鉅鹿郡公賀婁子幹太府少卿

高龍義等創造新都秋八月癸巳以左武侯大將軍竇榮定爲秦州總管十月癸酉皇太子勇屯兵咸陽以備胡庚寅上疾愈享百寮於觀德殿賜錢帛皆任其自取盡力而出辛卯以營新都副監賀婁子幹爲工部尚書十一月景午高麗遣使獻方物十二月辛未上講武於後園甲戌上柱國竇毅卒景子名新都曰大興城乙酉遣沁源公虞慶則屯弘化備胡突厥寇周槃行軍總管達奚長儒擊之爲虜所敗景戌賜國子生經明者束帛丁亥親錄囚徒

三年春正月庚子將入新都大赦天下禁大刀長稍癸亥高麗遣使來朝二月己巳朔日有蝕之壬申宴北道勲人癸酉陳遣兼散騎常侍賀徹兼通直散騎常侍蕭褒來聘突厥寇邊甲戌涇陽獲毛龜癸未以左衛大將軍李禮成爲右武衛大將軍三月丁未上柱國鮮虞縣公謝慶恩卒己酉以上柱國達奚長儒爲蘭州總管景辰雨常服入新都京師醴泉出丁巳詔購求遺

書於天下庚申宴百寮班賜各有差癸亥城榆
關夏四月己巳上柱國建平郡公于義卒庚午
吐谷渾寇臨洮洮州刺史皮子信死之辛未高
麗遣使來朝壬申以尚書右僕射趙昺兼內史
令丁丑以滕王瓚爲雍州牧己卯衛王爽破突
厥於白道庚辰行軍總管陰壽破高寶寧於黃
龍甲申早上親祈雨於國城之西南景戌詔天
下勸學行禮以濟北郡公梁遠爲汶州總管己
丑陳郢州城主張子譏遣使請降上以和好不

納辛卯遣兼散騎常侍薛舒兼通直散騎常侍
王劭使於陳癸巳上親雩甲午突厥遣使來朝
五月癸卯行軍總管李晃破突厥於摩那渡口
甲辰高麗遣使來朝乙巳梁太子蕭琮來賀遷
都丁未靺鞨貢方物戊申幽州總管陰壽卒辛
酉有事於方澤壬戌行軍元帥竇榮定破突厥
及吐谷渾於涼州景寅赦黃龍死罪以下六月
庚午以衛王爽子集爲遂安郡王戊寅突厥遣
使請和庚辰行軍總管梁遠破吐谷渾於爾汗

山斬其名壬申以晉州刺史燕榮爲青州總管己丑以河間王弘爲寧州總管乙未幸安成長公主第秋七月辛丑以豫州刺史周搖爲幽州總管壬戌詔曰行仁蹈義名教所先厲俗敦風宜見褒獎往者山東河表經此妖亂孤城遠守多不自全濟陰太守杜猷身陷賊徒命懸寇手郡省事范臺玫傾產營護免其戮辱眷言誠節實有可嘉宜超恒賞用明沮勸臺玫可大都督假湘州刺史丁卯日有蝕之八月丁丑靺鞨

貢方物己卯以右武衛大將軍李禮成爲湘州總管壬午遣尚書左僕射高頴出寧州道內史監虞慶則出原州道並爲行軍元帥以擊胡戊子上有事於太社九月壬子幸城東觀稼穀癸丑大赦天下冬十月甲戌廢河南道行臺省以秦王俊爲秦州總管十一月己酉發使巡省風俗因下詔曰朕君臨區宇深思治術欲使生人從化以德代刑求草萊之善旌閭里之行民間情僞咸欲備聞己詔使人所在賑恤揚鑣分路

將遍四海必令爲朕耳目如有文武才用未爲時知宜以禮發遣朕將銓擢其有志節高妙越等超倫亦仰使人就加旌異令一行一善獎勸於人遠近官司遐邇風俗巨細必紀還日奏聞庶使不出戶庭坐知萬里庚辰陳遣散騎常侍周墳通直散騎常侍表彥來聘陳主知上之貌異世人使彥畫像持去甲午罷天下諸郡閏十二月己卯遣兼散騎常侍唐令則通直散騎常侍魏澹使於陳戊午以上柱國竇榮定爲右武

衛大將軍刑部尚書蘇威爲民部尚書

四年春正月甲子日有蝕之己巳有事於太廟辛未有事於南郊壬申梁主蕭歸來朝甲戌大射於北苑十日而罷壬午齊州水辛卯渝州獲獸似麋一角同蹄壬辰班新曆二月乙巳上餞梁主於霸上丁未靺鞨貢方物突厥蘇尼部男女萬餘人來降庚戌幸隴州突厥可汗阿史那玷率其屬來降夏四月己亥勅總管刺史父母及子年十五已上不得將之官庚子以吏部尚

書虞慶則爲尚書右僕射瀛州刺史楊尚希爲
兵部尚書毛州刺史劉仁恩爲刑部尚書甲辰
以上柱國叱李長義爲信州總管丁未宴突厥
高麗吐谷渾使者於大興殿丁巳以上大將軍
賀婁子幹爲榆關總管五月癸酉契丹主莫賀
弗遣使請降拜大將軍景子以柱國馮昱爲汾
州總管乙酉以汴州刺史呂仲泉爲延州總管
六月庚子降囚徒乙巳以鴻臚卿乙弗寔爲翼
州總管上柱國豆盧勣爲夏州總管壬子開渠

自渭達河以通運漕戊午秦王俊來朝秋七月
景寅陳遣兼散騎常侍謝泉兼通直散騎常侍
賀德基來聘八月甲午遣十使巡省天下戊戌
衛王爽來朝是日以秦王俊納妃宴百僚班賜
各有差壬寅上柱國太傅鄧國公竇熾薨丁未
宴秦王官屬賜物各有差壬子享陳使乙卯陳
將夏侯苗請降上以通和不納九月甲子幸襄
國公主第乙丑幸霸水觀漕渠賜督役者帛各
有差己巳上親錄囚徒庚午契丹內附甲戌駕

幸洛陽關內飢也癸未太白晝見冬十一月壬戌遣兼散騎常侍薛道衡通直散騎常侍豆盧寔使於陳癸亥以榆關總管賀婁子幹爲雲州總管

五年春正月戊辰詔行新禮三月戊午以尚書左僕射高頴爲左領軍大將軍上柱國宇文忻爲右領軍大將軍夏四月甲午契丹主多彌遣使貢方物壬寅上柱國王誼謀反伏誅乙巳詔徵山東馬榮伯等六儒戊申車駕至自洛陽五

月甲申詔置義倉梁主蕭巋殂其太子琮嗣立遣上大將軍元契使于突厥阿波可汗秋七月庚申陳遣兼散騎常侍王詒兼通直散騎常侍阮卓來聘丁丑以上柱國宇文慶爲涼州總管壬午突厥沙鉢略上表稱臣八月景戌沙鉢略可汗遣子庫合真特勒來朝甲辰河南諸州水遣民部尚書邳國公蘇威賑給之戊申有流星數百四散而下巳酉幸栗園九月丁巳至自栗園乙丑改鮑陂曰杜陂霸水爲滋水陳將湛文

徹寇和州儀同三司費寶首獲之景子遣兼散
騎常侍李若兼通直散騎常侍崔君瞻使於陳
冬十月壬辰以上柱國楊素爲信州總管朔州
總管吐萬緒爲徐州總管十一月甲子以上大
將軍源雄爲朔州總管丁卯晉王廣來朝十二
月丁未降囚徒戊申以上柱國達奚長儒爲夏
州總管

六年春正月甲子党項羌內附庚午班曆於突
厥辛未以柱國韋洸爲安州總管壬申遣民部

尚書蘇威巡省山東二月乙酉山南荆浙七州
水遣前工部尚書長孫毗賑恤之景戌制刺史
上佐每歲暮更入朝上考課丁亥發丁男十一
萬修築長城二旬而罷乙未以上柱國崔弘度
爲襄州總管庚子大赦天下三月己未洛陽男
子高德上書請上爲太上皇傳位皇太子上曰
朕承天命撫育蒼生日旰孜孜猶恐不逮豈學
近代帝王事不師古傳位於子自求逸樂者哉
癸亥突厥沙鉢略遣使貢方物夏四月己亥陳

遣兼散騎常侍周碯兼通直散騎常侍江椿來
聘秋七月辛亥河南諸州水乙丑京師雨毛如
馬鬣尾長者二尺餘短者六七寸八月辛卯關
內七州旱免其賦稅遣散騎常侍裴豪兼通直
散騎常侍劉顛聘于陳戊申上柱國太師申國
公李穆薨閏月己酉以河州刺史段文振爲蘭
州總管丁卯皇太子鎮洛陽辛未晉王廣秦王
俊並來朝景子上柱國郟國公梁士彥上柱國
杞國公宇文忻柱國舒國公劉昉以謀反伏誅

上柱國許國公宇文善坐事除名九月辛巳上
素服御射殿詔百寮射賜梁士彥三家資物景
戌上柱國宋安郡公元景山卒庚子以上柱國
李詢爲隰州總管辛丑詔大象以來死事之家
咸令賑恤冬十月己酉以河北道行臺尚書令
并州總管晉王廣爲雍州牧餘官如故兵部尚
書楊尚希爲禮部尚書癸丑置山南道行臺尚
書省於襄州以秦王俊爲尚書令景辰以芳州
刺史駱平難爲疊州刺史衡州總管周法尚爲

黃州總管甲子甘露降于華林園

七年春正月癸巳有事于太廟乙未制諸州歲貢三人二月丁巳祀朝日于東郊巳巳陳遣兼散騎常侍王亨兼通直散騎常侍王春來聘壬申車駕幸醴泉宮是月發丁男十萬餘修築長城二旬而罷夏四月巳酉幸晉王第庚戌於揚州開山陽瀆以通運漕突厥沙鉢略可汗卒其子雍虞閭嗣立是爲都藍可汗癸亥頒青龍符於東方總管刺史西方以騶虞南方以朱雀北

方以玄武甲戌遣兼散騎常侍楊同兼通直散騎常侍崔儵使于陳以民部尚書蘇威爲吏部尚書五月乙亥朔日有蝕之巳卯雨石于武安滏陽間十餘里秋七月巳丑衛王爽薨上發喪于門下外省八月景午以懷州刺史源雄爲朔州總管庚申梁主蕭琮來朝九月乙酉梁安平王蕭巖掠於其國以奔陳辛卯廢梁國曲赦江陵以梁主蕭琮爲柱國封莒國公冬十月庚申行幸同州以先帝所居降囚徒癸亥幸蒲州景

隋書卷一
三十一
寅宴父老上極懽曰此間人物衣服鮮麗容止
閑雅良由仕宦之鄉陶染成俗也十一月甲午
幸馮翊親祠故社父老對詔失旨上大怒免其
縣官而去戊戌至自馮翊

帝紀第一

隋書一

帝紀第二

隋書二

高祖

特進臣魏

徵

上

八年春正月乙亥陳遣散騎常侍袁雅兼通直
散騎常侍周止水來聘二月庚子鎮星入東井
辛酉陳人寇碭州三月辛未上柱國隴西郡公
李詢卒壬申以成州刺史姜湏達為會州總管
甲戌遣兼散騎常侍程尚賢兼通直散騎常侍
韋暉使于陳戊寅詔曰昔有苗不賓唐堯薄伐

隋書卷二
孫皓僭虐晉武行誅有陳竊據江表逆天暴物
朕初受命陳頊尚存思欲教之以道不以龔行
為令往來修睦望其遷善時日無幾豐惡已聞
厚納叛亡侵犯城戍勾吳閩越肆厥殘忍于時
王師大舉將一車書陳頊反地收兵深懷震懼
責躬請約俄而致殞矜其喪禍仍詔班師叔寶
承風因求繼好載佇克念共敦行李每見珪璫
入朝輜軒出使何嘗不殷勤曉喻戒以維新而
狼子之心出而彌野威侮五行怠棄三正誅翦

骨肉夷滅才良據手掌之地恣溪壑之險劫奪
閭閻資產俱竭驅蹙內外勞役弗已徵責女子
擅造宮室日增月益止足無期帷簿嬪嬙有踰
萬數寶衣玉食窮奢極侈淫聲樂飲俾晝作夜
斬直言之客滅無罪之家剖人之肝分人之血
欺天造惡祭鬼求恩歌舞衢路酣醉宮闈盛粉
黛而執干戈曳羅綺而呼警蹕躍馬振策從旦
至昏無所經營馳走不息負甲持仗隨逐徒行
追而不及即加罪譴自古昏亂罕或能比介士

武夫飢寒力役筋髓罄於土木性命俟於溝渠
君子潛逃小人得志家家隱殺戮各各任聚斂
天災地孽物怪人妖衣冠鉗口道路以目傾心
翹足誓告於我日月以冀文奏相尋重以背德
違言搖蕩疆場巴峽之下海澨已西江北江南
為鬼為蜚歿隴窮發掘之酷生居極攘斂之苦
抄掠人畜斷截樵蘇市井不立農事廢寢歷陽
廣陵窺覷相繼或謀圖城邑或劫剝吏人晝伏
夜遊鼠竄狗盜彼則羸兵敝卒來必就擒此則

重門設險有勞藩捍天之所覆無非朕臣每關
聽覽有懷傷惻有梁之國我南藩也其君入朝
潛相招誘不顧朕恩士女深迫脅之悲城府致
空虛之歎非直朕居人上懷此無忘旣而百辟
屢以爲言兆庶不堪其請豈容對而不誅忍而
不救近日秋始謀欲弔人益部樓船盡令東騫
便有神龍數十騰躍江流引伐罪之師向金陵
之路船住則龍止船行則龍去四日之內三軍
皆覩豈非蒼旻愛人幽明展事降神先路協贊

軍威以上天之靈助戡定之力便可出師授律
應機誅殄在斯舉也永清吳越其將士糧仗水
陸資須期會進止一准別勅秋八月丁未河北
諸州飢遣吏部尚書蘇威賑恤之九月丁丑宴
南征諸將頒賜各有差癸巳嘉州言龍見冬十
月巳亥太白出西方巳未置淮南行臺省於壽
春以晉王廣爲尚書令辛酉陳遣兼散騎常侍
王琬兼通直散騎常侍許善心來聘拘留不遣
甲子將伐陳有事於太廟命晉王廣秦王俊清

河公楊素並爲行軍元帥以伐陳於是晉王廣
出六合秦王俊出襄陽清河公楊素出信州荆
州刺史劉仁恩出江陵宜陽公王世積出蘄春
新義公韓擒虎出廬江襄邑公賀若弼出吳州
落叢公燕榮出東海合總管九十兵五十一萬
八千皆受晉王節度東接滄海西拒巴蜀旌旗
舟楫橫亘數千里曲赦陳國有星孛于牽牛十
一月丁卯車駕餞師詔購陳叔寶位上柱國萬
戶公乙亥行幸定城陳師誓衆景子幸河東十

二月庚子至自河東

九年春正月己巳白虹夾日辛未賀若弼拔陳京口韓擒虎拔陳南豫州癸酉以尚書右僕射虞慶則爲右衛大將軍景子賀若弼敗陳師於蔣山獲其將蕭摩訶韓擒虎進師入建鄴獲其將任蠻奴獲陳主叔寶陳國平合州三十郡一百縣四百癸巳遣使持節巡撫之二月乙未廢淮南行臺省景申制五百家爲鄉正一人百家爲里長一人丁酉以襄州總管韋世康爲安州

總管夏四月己亥幸驪山親勞旋師乙巳三軍凱入獻俘於太廟拜晉王廣爲太尉庚戌上御廣陽門宴將士頒賜各有差辛亥大赦天下己未以陳都官尚書孔範散騎常侍王瑳王儀御史中丞沈觀等邪佞於其主以致亡滅皆投之邊裔辛酉以信州總管楊素爲荊州總管吏部侍郎宇文弼爲刑部尚書宗正少卿楊異爲工部尚書壬戌詔曰徃以吳越之野羣黎塗炭干戈方用積習未寧今率土大同含生遂性太平

之法方可流行凡我臣僚澡身浴德開通耳目
宜從茲始喪亂已來緬將十載君無君德臣失
臣道父有不慈子有不孝兄弟之情或薄夫婦
之義或違長幼失序尊卑錯亂朕爲帝王志存
愛養時有臻道不敢寧息內外職位遐邇黎人
家家自修人人克念使不軌不法蕩然俱盡兵
可立威不可不戢刑可助化不可專行禁衛九
重之餘鎮守四方之外戎旅軍器皆宜停罷伐
路旣夷羣方無事武力之子俱可學文人間甲

仗悉皆除毀有功之臣降情文藝家門子姪各
守一經令海內翕然高山仰止京邑庠序爰及
州縣生徒受業升進於朝未有灼然明經高第
此則教訓不篤考課未精明勒所由隆茲儒訓
官府從宦丘園素士心迹相表寬弘爲念勿爲
跼促垂我皇猷朕君臨區宇於茲九載開直言
之路披不諱之心形於顏色勞於興寢自頃逞
藝論功昌言乃衆推誠切諫其事甚踈公卿士
庶非所望也各啓至誠匡茲不逮見善必進有

才必舉無或噤嘿退有後言頒告天下咸悉此
意閏月甲子以安州總管韋世康爲信州總管
丁丑頒木魚符於總管刺史雌一雄一己卯以
吏部尚書蘇威爲尚書右僕射六月乙丑以荆
州總管楊素爲納言丁丑以吏部侍郎盧愷爲
禮部尚書時朝野物議咸願登封秋七月景午
詔曰豈可命一將軍除一小國遐邇注意便謂
太平以薄德而封名山用虛言而干上帝非朕
攸聞而今以後言及封禪宜即禁絕八月壬戌

以廣平王雄爲司空冬十一月壬辰考使定州
刺史豆盧通等上表請封禪上不許庚子以右
衛大將軍虞慶則爲右武侯大將軍右領軍將
軍李安爲右領軍大將軍甲寅降囚徒十二月
甲子詔曰朕祇承天命清蕩萬方百王衰敝之
後兆庶澆浮之日聖人遺訓掃地俱盡制禮作
樂今也其時朕情存古樂深思雅道鄭衛淫聲
魚龍雜戲樂府之內盡以除之今欲更調律呂
改張琴瑟且妙術精微非因教習工人代掌止

傳糟粕不足達神明之德論天地之和區域之間竒才異議天知神授何代無哉蓋晦迹於非時侯昌言於所好宜可搜訪速以奏聞庶覩一藝之能共就九成之業仍詔太常牛弘通直散騎常侍許善心祕書丞姚察通直郎虞世基等議定作樂己巳以黃州總管周法尚爲永州總管

十年春正月乙未以皇孫昭爲河南王楷爲華陽王二月庚申幸并州夏四月辛酉至自并州

五月乙未詔曰魏末喪亂寓縣瓜分役車歲動未遑休息兵士軍人權置坊府南征北伐居處無定家無完堵地罕包桑恒爲流寓之人竟無鄉里之號朕甚愍之凡是軍人可悉屬州縣墾田籍帳一與民同軍府統領宜依舊式罷山東河南及北方緣邊之地新置軍府六月辛酉制人年五十免役收庸癸亥以靈州總管王世積爲荊州總管浙州刺史元胄爲靈州總管秋七月癸卯以納言楊素爲內史令庚戌上親錄囚

徒癸亥高麗遼東郡公高陽卒壬子吐谷渾遣使來朝八月壬申遣柱國襄陽郡公韋洸上開府東萊郡公王景並持節巡撫嶺南百越皆服冬十月甲子頒木魚符於京師官五品已上戊辰以永州總管周法尚爲桂州總管十一月辛卯幸國學頒賜各有差景午契丹遣使朝貢辛丑有事于南郊是月婺州人汪文進會稽人高智慧蘇州人沈玄愴皆舉兵反自稱天子署置百官樂安蔡道人蔣山李稜饒州吳代華永嘉沈孝澈泉州王國慶餘杭楊審英交趾李春等皆自稱大都督攻陷州縣詔上柱國內史令越國公楊素討平之

十一年春正月丁酉以平陳所得古器多爲妖變悉命毀之辛丑高麗遣使朝貢景午皇太子妃元氏薨上舉哀於文思殿二月戊午吐谷渾遣使貢方物以大將軍蘇孝慈爲工部尚書景子以臨潁令劉曠治術尤異擢爲莒州刺史己卯突厥遣使獻七寶益辛巳晦日有蝕之三月

壬午遣通事舍人若干洽使于吐谷渾癸未以
幽州總管周搖爲壽州總管朔州總管吐萬緒
爲夏州總管夏四月戊午突厥雍虞間可汗遣
其特勒來朝五月甲子高麗遣使貢方物癸卯
詔百官悉詣朝堂上封事乙巳以右衛將軍元
旻爲左衛大將軍秋七月己丑以柱國杜彥爲
洪州總管八月壬申幸栗園滕王瓚薨乙亥至
自栗園上柱國沛國公鄭譯卒十二月景辰靺
鞨遣使貢方物

十二年春正月壬子以蘇州刺史皇甫績爲信
州總管宣州刺史席代雅爲廣州總管二月己
巳以蜀王秀爲內史令兼右領軍大將軍漢王
諒爲雍州牧右衛大將軍夏四月辛卯以壽州
總管周搖爲襄州總管五月辛亥廣州總管席
代雅卒秋七月乙巳尚書右僕射邳國公蘇威
禮部尚書容城縣侯盧愷並坐事除名壬戌幸
昆明池其日還宮己巳有事於太廟壬申晦日
有蝕之八月甲戌制天下死罪諸州不得便決

皆令大理覆治乙亥幸龍首池癸巳制宿衛者
不得輒離所守丁酉上柱國夏州總管楚國公
豆盧勳卒戊戌上親錄囚徒九月丁未以工部
尚書楊昇爲吳州總管冬十月丁丑以遂安王
集爲衛王壬午有事于太廟至太祖神主前上
流涕嗚咽悲不自勝十一月辛亥有事于南郊
壬子宴百寮頒賜各有差巳未上柱國新義郡
公韓擒虎卒庚申以豫州刺史權武爲潭州總
管甲子百寮大射於武德殿十二月癸酉突厥

遣使來朝乙酉以上柱國內史令楊素爲尚書
右僕射巳酉吐谷渾靺鞨並遣使貢方物

十三年春正月乙巳上柱國郇國公韓達業卒
景午契丹奚霫室韋並遣使貢方物壬子親祀
感帝巳未以信州總管韋世康爲吏部尚書壬
戌行幸岐州二月景子詔營仁壽宮丁亥至自
岐州戊子宴考使於嘉則殿巳卯立皇孫暕爲
豫章王戊子晉州刺史南陽郡公賈悉達隰州
總管撫寧郡公韓延等以賄伏誅巳丑制坐事

去官者配流一年丁酉制私家不得隱藏緯候
圖讖夏四月癸未制戰亡之家給復一年五月
癸亥詔人間有撰集國史臧否人物者皆令禁
絕秋七月戊申靺鞨遣使貢方物壬子左衛大
將軍雲州總管鉅鹿郡公賀婁子幹卒丁巳辛
昆明池戊辰晦日有蝕之九月景辰降囚徒庚
申以邵國公楊綸爲滕王乙丑以柱國杜彥爲
雲州總管冬十月乙卯上柱國華陽郡公梁彥
先卒

十四年夏四月乙丑詔曰在昔聖人作樂崇德
移風易俗於斯爲大自晉氏播遷兵戈不息雅
樂流散年代已多四方未一無由辨正賴上天
鑒臨明神降福拯茲塗炭安息蒼生天下大同
歸於治理遺文舊物皆爲國有比命所司總令
研究正樂雅聲詳考已訖宜即施用見行者停
人間音樂流僻日久棄其舊體競造繁聲浮宕
不歸遂以成俗宜加禁約務存其本五月辛酉
京師地震關內諸州旱六月丁卯詔省府州縣

皆給公廨田不得治生與人爭利秋七月乙未以邳國公蘇威爲納言八月辛未關中大旱人飢上率戶口就食於洛陽九月己未以齊州刺史樊子蓋爲循州總管丁巳以基州刺史崔仲方爲會州總管冬閏十月甲寅詔曰齊梁陳徃皆創業一方綿歷年代旣宗祀廢絕祭奠無主興言矜念良以愴然莒國公蕭琮及高仁英陳叔寶等宜令以時脩其祭祀所須器物有司給之乙卯制外官九品已上父母及子年十五已

上不得將之官十一月壬戌制州縣佐吏三年一代不得重任癸未有星孛于角亢十二月乙未東巡狩

十五年春正月壬戌車駕次齊州親問疾苦景寅旅王符山庚午上以歲旱祠太山以謝愆咎大赦天下二月景辰收天下兵器敢有私造者坐之關中緣邊不在其例丁巳上柱國蔣國公梁睿卒三月己未至自東巡狩望祭五嶽海瀆丁亥幸仁壽宮營州總管韋藝卒夏四月己丑

朔大赦天下甲辰以趙州刺史楊達爲工部尚書丁未以開府儀同三司韋沖爲營州總管五月癸酉吐谷渾遣使朝貢丁亥制京官五品已上佩銅魚符六月戊子詔鑿底柱庚寅相州刺史豆盧通貢綾文布命焚之於朝堂乙未林邑遣使來貢方物辛丑詔名山大川未在祀典者悉祠之秋七月乙丑晉王諱獻毛龜甲戌遣邳國公蘇威巡省江南戊寅至自仁壽宮辛巳制九品已上官以理去職者聽並執笏冬十月戊子以吏部尚書韋世康爲荊州總管十一月辛酉幸溫湯乙丑至自溫湯十二月戊子勅盜邊糧一升已上皆斬並籍沒其家己丑詔文武官以四考交代

十六年春正月丁亥以皇孫裕爲平原王筠爲安成王嶷爲安平王恪爲襄城王該爲高陽王韶爲建安王暎爲潁川王夏五月丁巳以懷州刺史龐晃爲夏州總管蔡陽縣公姚辯爲靈州總管六月甲午制工商不得進仕并州大蝗辛

丑詔九品已上妻五品已上妾夫亡不得改嫁
秋八月景戌詔決死罪者三奏而後行刑冬十
月已丑幸長春宮十一月壬子至自長春宮

十七年春二月癸未太平公史萬歲擊西寧羌
平之庚寅幸仁壽宮庚子上柱國王世積討桂
州賊李光仕平之壬寅河東王昭納妃宴羣臣
頒賜各有差三月景辰詔曰分職設官共理時
務班位高下各有等差若所在官人不相敬憚
多自寬縱事難克舉諸有殿失雖備科條或據

律乃輕論情則重不即決罪無以懲肅其諸司
論屬官若有愆犯聽於律外斟酌決杖辛酉上
親錄囚徒癸亥上柱國彭國公劉昶以罪伏誅
庚午遣治書侍御史柳彧皇甫誕巡省河南河
北夏四月戊寅頒新曆壬午詔曰周曆告終羣
凶作亂豐起蕃服毒被生人朕受命上玄廓清
區宇聖靈垂祐文武同心申明公穆鄭襄公孝
寬廣平王雄蔣國公睿楚國公勣齊國公頰越
國公素魯國公慶則新寧公長乂宜陽公世積

趙國公羅雲隴西公詢廣業公景真昌公振沛國公譚項城公子相鉅鹿公子幹等登庸納揆之時草昧經綸之日丹誠大節心盡帝圖茂績殊勲力宣王府宜弘其門緒與國同休其世子世孫未經州任者宜量才并用庶享榮位世祿無窮五月宴百寮於玉女泉頒賜各有差已巳蜀王秀來朝高麗遣使貢方物甲戌以左衛將軍獨孤羅雲爲涼州總管閏月已卯羣鹿入殿門馴擾侍衛之內秋七月丁丑桂州人李代賢

反遣右武侯大將軍虞慶則討平之丁亥上柱國并州總管秦王俊坐事免以王就第戊戌突厥遣使貢方物八月丁卯荊州總管上庸郡公韋世康卒九月甲申至自仁壽宮庚寅上謂侍臣曰禮主於敬皆當盡心黍稷非馨貴在祗肅廟庭設樂本以迎神齋祭之日觸目多感當此之際何可爲心在路奏樂禮未爲允羣公卿士宜更詳之冬十月丁未頒銅獸符於驃騎車騎府戊申道王靜薨庚午詔曰五帝異樂三王殊

禮皆隨事而有損益因情而立節文仰惟祭享宗廟瞻敬如在罔極之感情深茲日而禮畢升路鼓吹發音還入宮門金石振響斯則哀樂同日心事相違情所不安理實未允宜改茲往式用弘禮教自今已後享廟日不須備鼓吹殿庭勿設樂懸辛未京師大索十一月丁亥突厥遣使來朝十二月壬子上柱國右武侯大將軍魯國公虞慶則以罪伏誅

十八年春正月辛丑詔曰吳越之人往承敝俗

所在之處私造大船因相聚結致有侵害其江南諸州人間有船長三文已上悉括入官二月甲辰幸仁壽宮乙巳以漢王諒爲行軍元帥水陸三十萬伐高麗三月乙亥以柱國杜彥爲朔州總管夏四月癸卯以蔣州刺史郭衍爲洪州總管五月辛亥詔畜猫鬼蟲毒厥魅野道之家投於四裔六月景寅下詔黜高麗王高元官爵秋七月壬申詔以河南八州水免其課役景子詔京官五品已上總管刺史以志行修謹清平

幹濟二科舉人九月己丑漢王諒師遇疾疫而
旋死者十八九庚寅勅舍客無公驗者坐及刺
史縣令辛卯至自仁壽宮冬十一月甲戌上親
錄囚徒癸未有事于南郊十二月庚子上柱國
夏州總管任城郡公王景以罪伏誅是月自京
師至仁壽宮置行宮十有二所

十九年春正月癸酉大赦天下戊寅大射武德
殿宴賜百官二月己亥晉王諱來朝辛丑以并
州總管長史宇文弼爲朔州總管甲寅幸仁壽

宮夏四月丁酉突厥利可汗內附達頭可汗犯
塞遣行軍總管史萬歲擊破之六月丁酉以豫
章王暕爲內史令秋八月癸卯上柱國尚書左
僕射齊國公高熲坐事免辛亥上柱國皖城郡
公張威卒甲寅上柱國城陽郡公李徹卒九月
乙丑以太常卿牛弘爲吏部尚書冬十月甲午
以突厥利可汗爲啓人可汗築大利城處其部
落庚子以朔州總管宇文弼爲代州總管十二
月乙未突厥都藍可汗爲部下所殺丁丑星竇

於勃海

二十年春正月辛酉朔上在仁壽宮突厥高麗
契丹並遣使貢方物癸亥以代州總管宇文弼
爲吳州總管二月己巳以上柱國崔弘度爲原
州總管丁丑無雲而雷三月辛卯熙州人李英
林反遣行軍總管張衡討平之夏四月壬戌突
厥犯塞以晉王廣爲行軍元帥擊破之乙亥天
有聲如瀉水自南而北六月丁丑秦王俊薨秋
八月老人星見九月丁未至自仁壽宮癸丑吳

州總管楊昇卒冬十月己未太白晝見乙丑皇
太子勇及諸子並廢爲庶人殺柱國太平縣公
史萬歲己巳殺左衛大將軍五原郡公元旻十
一月戊子天下地震京師大風雪以晉王廣爲
皇太子十二月戊午詔東宮官屬不得稱臣於
皇太子辛巳詔曰佛法深妙道教虛融咸降大
慈濟度羣品凡在含識皆蒙覆護所以雕鑄靈
相圖寫真形率土瞻仰用申誠敬其五嶽四鎮
節宣雲雨江河淮海浸潤區域並生養萬物利

益兆人故建廟立祀以時恭敬敢有毀壞偷盜
佛及天尊像嶽鎮海瀆神形者以不道論沙門
壞佛像道士壞天尊者以惡逆論

仁壽元年春正月乙酉朔大赦改元以尚書右
僕射楊素爲尚書左僕射納言蘇威爲尚書右
僕射丁酉徙河南王昭爲晉王突厥寇恒安遣
柱國韓洪擊之官軍敗績以晉王昭爲內史令
辛丑詔曰君子立身雖云百行唯誠與孝最爲
其首故投主殉節自古稱難殉身王事禮加二

等而代俗之徒不達大義至於致命戎旅不入
兆域虧孝子之意傷人臣之心興言念此每深
愍歎且入廟祭祀並不廢闕何止墳塋獨在其
外自今已後戰亡之徒宜入墓域二月乙卯朔
日有蝕之辛巳以上柱國獨孤楷爲原州總管
三月壬辰以豫章王暕爲揚州總管夏四月以
浙州刺史蘇孝慈爲洪州總管五月己丑突厥
男女九萬口來降壬辰驟雨震雷大風拔木宜
君湫水移於始平六月己丑洪州總管蘇孝慈

附錄卷二
卒乙卯遣十六使巡省風俗乙丑詔曰儒學之道訓教生人識父子君臣之義知尊卑長幼之序升之於朝任之以職故能贊理時務弘益風範朕撫臨天下思弘德教延集學徒崇建庠序開進仕之路佇賢雋之人而國學胄子垂將千數州縣諸生成亦不少徒有名錄空度歲時未有德爲代範才任國用良由設學之理多而未精今宜簡省明加獎勵於是國子學唯留學生七十人太學四門及州縣學並廢其日頒舍利

於諸州秋七月戊戌改國子爲太學九月癸未以柱國杜彥爲雲州總管十一月己丑有事於南郊壬辰以資州刺史衛玄爲遂州總管

二年春二月辛亥以荊州刺史侯莫陳穎爲桂州總管宗正楊祀爲荊州總管三月己亥幸仁壽宮壬寅以齊州刺史張喬爲潭州總管夏四月庚戌岐雍二州地震秋七月景戌詔內外官各舉所知戊子以原州總管獨孤楷爲益州總管八月己巳皇后獨孤氏崩九月景戌至自仁

附錄卷二
壽宮壬辰河南北諸州大水遣工部尚書楊達賑恤之乙未上柱國襄州總管金水郡公周搖卒隴西地震冬十月壬子曲赦益州管内癸丑以工部尚書楊達爲納言閏月甲申詔尚書左僕射楊素與諸術者判定陰陽舛謬已丑詔曰禮之爲用時義大矣黃琮蒼璧降天地之神粢盛牲食展宗廟之敬正父子君臣之序明婚姻喪紀之節故道德仁義非禮不成安上治人莫善於禮自區宇亂離縣歷年代王道衰而變風

作微言絕而大義乖與代推移其弊日甚至於四時郊祀之節文五服麻葛之隆殺是非異說踳駁殊塗致使聖教凋訛輕重無准朕祇承天命撫臨生人當洗滌之時屬干戈之代克定禍亂先運武功刪正彝典日不暇給今四海乂安五戎勿用理宜弘風訓俗導德齊禮綴往聖之舊章興先王之茂則尚書左僕射越國公楊素尚書右僕射邳國公蘇威吏部尚書竒章公牛弘內史侍郎薛道衡祕書丞許善心內史舍人

虞世基著作郎王劭或任居端揆博達古今或
器推令望學綜經史委以裁緝實允僉議可並
修定五禮壬寅葬獻皇后於太陵十二月癸巳
上柱國益州總管蜀王秀廢爲庶人交州人李
佛子舉兵反遣行軍總管劉方討平之

三年春二月己卯原州總管比陽縣公龐晃卒
戊子以大將軍蔡陽郡公姚辯爲左武侯大將
軍夏五月癸卯詔曰哀哀父母生我劬勞欲報
之德昊天罔極但風樹不靜巖敬莫追霜露旣

降感思空切六月十三日是朕生日宜令海內
爲武元皇帝元明皇后斷屠六月甲午詔曰禮
云至親以朞斷蓋以四時之變易萬物之更始
故聖人象之其有三年加隆爾也但家無二尊
母爲厭降是以父存喪母還服于朞者服之正
也豈容朞內而更小祥然三年之喪而有小祥
者禮云朞祭禮也朞而除喪道也以是之故雖
未再朞而天地一變不可不祭不可不除故有
練焉以存喪祭之本然朞喪有練於理未安雖

云十一月而練乃無所法象非暮非時豈可除
祭而儒者徒擬三年之喪立練禫之節可謂苟
存其變而失其本欲漸於奪乃薄於喪致使子
則冠練去經黃裏縗緣經則布葛在躬麤服未
改豈非經衰尚存子情已奪親踈失倫輕重顛
倒乃不順人情豈聖人之意也故知先聖之禮
廢於人邪三年之喪尚有不行之者至於祥練
之節安能不墜者乎禮云父母之喪無貴賤一
也而大夫士之喪父母乃貴賤異服然則禮壞

樂崩由來漸矣所以晏平仲之斬麤練其老謂
之非禮滕文公之服三年其臣咸所不欲蓋由
王道既衰諸侯異政將踰越於法度惡禮制之
害已乃滅去篇籍自制其宜遂至骨肉之恩輕
重從俗無易之道隆殺任情况孔子沒而微言
隱秦滅學而經籍焚者乎有漢之興雖求儒雅
人皆異說義非一貫又近代亂離唯務兵革其
於典禮時所未遑夫禮不從天降不從地出乃
人心而已者謂情緣於恩也故恩厚者其禮隆

情輕者其禮殺聖人以是稱情立文別親疎貴賤之節自臣子道消上下失序莫大之恩逐情而薄莫重之禮與時而殺此乃服不稱喪容不稱服非所謂聖人緣恩表情制禮之義也然喪與易也寧在於戚則禮之本也禮有其餘未若於哀則情之實也今十一月而練者非禮之本非情之實由是言之父存喪母不宜有練但依禮十二月而禫中月而禫庶以合聖人之意達孝子之心秋七月丁卯詔曰日往月來唯天所

以運序山鎮川流唯地所以宣氣運序則寒暑無差宣氣則雲雨有作故能成天地之大德育萬物而爲功况一人君於四海睹物欲運獨見致治不藉群才未之有也是以唐堯欽明命羲和以居岳虞舜叡德升元凱而作相伊尹鼎俎之媵爲殷之阿衡呂望漁釣之夫爲周之尚父此則鳴鶴在陰其子必和風雲之從龍虎賢哲之應聖明君德不回臣道以正故能通天地之和順陰陽之序豈不由元首而有股肱乎自王

道衰人風薄居上莫能公道以御物爲下必踵私法以希時上下相蒙君臣義失義失則政乖政乖則人困蓋同德之風難嗣離德之軌易追不測是以行歌避代辭位灌園卷而可懷黜而無愠放逐江湖之上沈赴河海之流所以自潔而不悔者也至於閭閻秀異之士鄉曲博雅之儒言足以佐時行足以勵俗遺棄於草野堙滅而無聞豈勝道哉所以覽古而歎息者也方今

區宇一家煙火萬里百姓乂安四夷賓服豈是人功實乃天意朕惟夙夜祇懼將所以上嗣明靈是以小心勵已日慎一日以黎元在念憂兆庶未康以庶政爲懷慮一物失所雖求傅巖莫見幽人徒想崆峒未聞至道唯恐商歌於長夜抱關於夷門遠跡犬羊之間屈身僮僕之伍其令州縣搜揚賢哲皆取明知今古通識治亂究政教之本達禮樂之源不限多少不得不舉限以三旬咸令進路徵召將送必須以禮八月壬

申上柱國檢校幽州總管落叢郡公燕榮以罪
伏誅九月壬戌置常平官甲子以營州總管韋
冲爲民部尚書十二月癸酉河南諸州水遣納
言楊達賑恤之

四年春正月景辰大赦甲子幸仁壽宮乙丑詔
賞罰支度事無巨細並付皇太子夏四月乙卯
上不豫六月庚申大赦天下有星入月中數日
而退長人見於鴈門秋七月乙未日青無光八
日乃復己亥以大將軍段文振爲雲州總管甲

辰上以疾甚卧于仁壽宮與百寮辭訣並握手
歔歔丁未崩于大寶殿時年六十四遺詔曰嗟
乎自昔晉室播遷天下喪亂四海不一以至周
齊戰爭相尋年將三百故割疆土者非一所稱
帝王者非一人書軌不同生人塗炭上天降鑒
爰命於朕用登大位豈關人力故得撥亂反正
偃武修文天下大同聲教遠被此又是天意欲
寧區夏所以昧旦臨朝不敢逸豫一日萬機留
心親覽晦朔寒暑不憚劬勞匪曰朕日蓋爲百

姓故也王公卿士每日闕庭刺史以下三時朝
集何嘗不罄竭心府誠勅殷勤義乃君臣情兼
父子庶藉百寮智力萬國歡心欲令率土之人
永得安樂不謂遘疾彌留至於大漸此乃人生
常分何足言及但四海百姓衣食不豐教化政
刑猶未盡善興言念此唯以留恨朕今年踰六
十不復稱夭但筋力精神一時勞竭如此之事
本非爲身止欲安養百姓所以致此人生子孫
誰不愛念旣爲天下事須割情勇及秀等竝懷

悖惡旣知無臣子之心所以廢黜古人有言知
臣莫若於君知子莫若於父若令勇秀得志共
治家國必當戮辱徧於公卿酷毒流於人庶今
惡子孫已爲百姓黜屏好子孫足堪負荷大業
此雖朕家事理不容隱前對文武侍衛具已論
述皇太子廣地居上嗣仁孝著聞以其行業堪
成朕志但令內外群官同心戮力以此共治天
下朕雖瞑目何所復恨但國家事大不可限以
常禮旣葬公除行之自昔今宜遵用不勞改定

凶禮所須纔令周事務從節儉不得勞人諸州
摠管刺史已下宜各率其職不須奔赴自古哲
王因人作法前帝後帝沿革隨時律令格式或
有不便於事者宜依前式修改務當政要嗚呼
敬之哉無墜朕命乙卯發喪河間楊柳四株無
故黃落既而花葉復生八月丁卯梓宮至自仁
壽宮景子殯于大興前殿冬十月己卯合葬於
太陵同墳而異穴上性嚴重有威容外質木而
內明敏有大略初得政之始羣情不附諸子幼

弱內有六王之謀外致三方之亂握強兵居重
鎮者皆周之舊臣上推以赤心各展其用不踰
朞月克定二邊未及十年平一四海薄賦歛輕
刑罰內脩制度外撫戎夷每旦聽朝日昃忘倦
居處服翫務存節儉令行禁止上下化之開皇
仁壽之間丈夫不衣綾綺而無金玉之飾常服
率多布帛裝帶不過以銅鐵骨角而已雖畱於
財至於賞賜有功亦無所愛恡乘輿四出路逢
上表者則駐馬親自臨問或潛遣行人採聽風

俗吏治得失人間疾苦無不留意嘗遇關中飢遣左右視百姓所食有得豆屑雜糠而奏之者上流涕以示羣臣深自咎責爲之撤膳不御酒肉者殆將一朞及東拜太山關中戶口就食洛陽者道路相屬上勅斥候不得輒有驅逼男女參廁於仗衛之間逢扶老携幼者輒引馬避之慰勉而去至艱險之處見負擔者遽令左右扶助之其有將士戰沒必加優賞仍令使者就家勞問自強不息朝夕孜孜人庶殷繁帑藏充實

雖未能臻於至治亦足稱近代之良主然天性沈猜素無學術好爲小數不達大體故忠臣義士莫得盡心竭辭其草創元勳及有功諸將誅夷罪退罕有存者又不悅詩書廢除學校唯婦言是用廢黜諸子逮于暮年持法尤峻喜怒非常過於殺戮嘗令左右送西域朝貢使出玉門關其所經之處或受牧宰小物饋遺鸚鵡麋皮馬鞭之屬上聞而大怒又詣武庫見署中蕪穢不治於是執武庫令及諸受遺者出開遠門

外親自臨決死者數十人又往往潛令人賂遺
令史府史有受者必死無所寬貸議者以此少
之

史臣曰高祖龍德在田竒表見異晦明藏用故
知我者希始以外戚之尊受託孤之任與能之
議未爲當時所許是以周室舊臣咸懷憤惋既
而王謙固三蜀之阻不踰朞月尉迥舉全齊之
衆一戰而亡斯乃非止人謀抑亦天之所贊也
乘茲機運遂遷周鼎于時蠻夷猾夏荆揚未一

劬勞日昃經營四方樓船南邁則金陵失險驃
騎北指則單于款塞職方所載並入疆理禹貢
所圖咸受正朔雖晉武之克平吳會漢宣之推
亡固存比義論功不能尚也七德旣敷九歌已
洽要荒咸暨尉候無警於是躬節儉平徭賦倉
廩實法令行君子咸樂其生小人各安其業強
無陵弱衆不暴寡人物殷阜朝野歡娛二十年
間天下無事區宇之內晏如也考之前王足以
參蹤盛烈但素無術學不能盡下無寬仁之度

有刻薄之資暨乎暮年此風逾扇又雅好符瑞
暗於大道建彼維城權侂京室皆同帝制靡所
適從聽哲婦之言惑邪臣之說溺寵廢嫡託付
失所滅父子之道開昆弟之隙縱其尋斧翦伐
本枝墳土未乾子孫繼踵屠戮松檟纔列天下
已非隋有惜哉迹其衰怠之源稽其亂亡之兆
起自高祖成於煬帝所由來遠矣非一朝一夕
其不祀忽諸未爲不幸也

帝紀第二

隋書二

帝紀第三

隋書三

特進臣魏徵

上

煬帝上

煬皇帝諱廣一名英小字阿麼高祖第二子也
母曰文獻獨孤皇后上美姿儀少敏慧高祖及
后於諸子中特所鍾愛在周以高祖勲封鴈門
郡公開皇元年立爲晉王拜柱國并州總管時
年十三尋授武衛大將軍進位上柱國河北道
行臺尚書令大將軍如故高祖令項城公歆安

道公才李徹輔導之上好學善屬文沉深嚴重
朝野屬望高祖密令善相者來和徧視諸子和
曰晉王眉上雙骨隆起貴不可言旣而高祖幸
上所居第見樂器絃多斷絕又有塵埃若不用
者以爲不好聲妓善之上尤自矯飾當時稱爲
仁孝嘗觀獵遇雨左右進油衣上曰士卒皆霑
濕我獨衣此乎乃令持去六年轉淮南道行臺
尚書令其年徵拜雍州牧內史令八年冬大舉
伐陳以上爲行軍元帥及陳平執陳湘州刺史

施文慶散騎常侍沈客卿市令陽慧朗刑法監
徐析尚書都令史暨慧以其邪佞有害於民斬
之右闕下以謝三吳於是封府庫資財無所取
天下稱賢進位太尉賜輅車乘馬袞冕之服玄
珪白璧各一復拜并州總管俄而江南高智慧
等相聚作亂徙上爲揚州總管鎮江都每歲一
朝高祖之祠太山也領武侯大將軍明年歸藩
後數載突厥寇邊復爲行軍元帥出靈武無虜
而還及太子勇廢立上爲皇太子是月當受冊

高祖曰吾以大興公成帝業令上出舍大興縣其夜烈風大雪地震山崩民舍多壞壓死者百餘口仁壽初奉詔巡撫東南是後高祖每避暑仁壽宮恒令上監國四年七月高祖崩上即皇帝位於仁壽宮八月奉梓宮還京師并州總管漢王諒舉兵反詔尚書左僕射楊素討平之九月乙巳以備身將軍崔彭爲左領軍大將軍十一月乙未幸洛陽景申發丁男數十萬掘塹自龍門東接長平汲郡抵臨清關度河至浚儀襄

城達於上洛以置關防癸丑詔曰乾道變化陰陽所以消息沿創不同生靈所以順叙若使天意不變施化何以成四時人事不易爲政何以釐萬姓易不云乎通其變使民不倦變則通通則久有德則可久有功則可大朕又聞之安安而能遷民用丕變是故姬邑兩周如武王之意殷人五徙成湯后之業若不因人順天功業見乎變愛人治國者可不謂歟然洛邑自古之都王畿之內天地之所合陰陽之所和控以三河

固以四塞水陸通貢賦等故漢祖曰吾行天下多矣唯見洛陽自古皇王何嘗不留意所不都者蓋有由焉或以九州未一或以困其府庫作洛之制所以未暇也我有隋之始便欲創茲懷雒日復一日越暨于今念茲在茲興言感哽朕肅膺寶曆纂臨萬邦遵而不失心奉先志今者漢王諒悖逆毒被山東遂使州縣或淪非所此由關河懸遠兵不赴急加以并州移居復在河南周遷殷人意在於此况復南服遐遠東夏殷

人因機順動今也其時羣司百辟僉諧厥議但成周墟堦弗堪葺宇今可於伊洛營建東京便即設官分職以爲民極也夫宮室之制本以便生上棟下宇足避風露高臺廣廈豈曰適形故傳云儉德之共侈惡之大宣尼有云與其不遜也寧儉豈謂瑤臺瓊室方爲宮殿者乎土堦采椽而非帝王者乎是知非天下以奉一人乃一人以主天下也民惟國本本固邦寧百姓足孰與不足今所營構務從節儉無令雕牆峻宇復

起於當今欲使卑宮菲食將貽於後世有司明爲條格稱朕意焉十二月乙丑以右武衛將軍來護兒爲右驍衛大將軍戊辰以柱國李景爲右武衛大將軍以右衛率周羅暉爲右武侯大將軍

大業元年春正月壬辰朔大赦改元立妃蕭氏爲皇后改豫州爲溱州洛州爲豫州廢諸州總管府丙申立晉王昭爲皇太子丁酉以上柱國宇文述爲左衛大將軍上柱國郭衍爲左武衛

大將軍延壽公于仲文爲右衛大將軍己亥以豫章王暕爲豫州牧戊申發八使巡省風俗下詔曰昔者哲王之治天下也其在愛民乎旣富而教家給人足故能風淳俗厚遠至邇安治定功成率由斯道朕嗣膺寶曆撫育黎獻夙夜戰兢若臨川谷雖則聿遵先緒弗敢失墜永言政術多有缺然况以四海之遠兆民之衆未獲親臨問其疾苦每慮幽仄莫舉冤屈不申一物失所乃傷和氣萬方有罪責在朕躬所以寤寐增

歎而夕惕載懷者也今旣布政惟始宜存寬大
可分遣使人巡省方俗宣揚風化薦拔幽滯申
達幽枉孝悌力田給以優復鰥寡孤獨不能自
存者量加振濟義夫節婦旌表門閭高年之老
加其版授並依別條賜以粟帛篤疾之徒給侍
丁者雖有侍養之名曾無調贍之實明加檢校
使得存養若有名行顯著操履脩絜及學業才
能一藝可取咸宜訪採將身入朝所在州縣以
禮發遣其有蠹政害人不便於時者使還之日

具錄奏聞己酉以吳州總管宇文弼爲刑部尚
書二月己卯以尚書左僕射楊素爲尚書令三
月丁未詔尚書令楊素納言楊達將作大匠宇
文愷營建東京徙豫州鄆下居人以實之戊申
詔曰聽採輿頌謀及庶民故能審政刑之得失
是知昧旦思治欲使幽枉必達彞倫有章而牧
宰任稱朝委苟爲徼幸以求考課虛立殿最不
存治實綱紀於是弗理冤屈所以莫申關河重
阻無由自達朕故建立東京躬親存問今將巡

歷淮海觀省風俗春求讜言徒繁詞翰而鄉校之內闕爾無聞恇然夕惕用忘興寢其民下有知州縣官人政治苛刻侵害百姓背公徇私不使於民者宜聽詣朝堂封奏庶乎四聰以達天下無冤又於阜澗營顯仁宮採海內奇禽異獸草木之類以實園苑徙天下富商大賈數萬家於東京辛亥發河南諸郡男女百餘萬開通濟渠自西苑引穀洛水達于河自板渚引河通于淮庚申遣黃門侍郎王弘上儀同於士澄往江

南採木造龍舟鳳艚黃龍赤艦樓船等數萬艘夏四月癸亥大將軍劉方擊林邑破之五月庚戌民部尚書義豐侯韋冲卒六月甲子熒惑入太微秋七月丁酉制戰亡之家給復十年景午滕王綸衛王集並奪爵徙邊閏七月甲子以尚書令楊素爲太子太師安德王雄爲太子太傅河間王弘爲太子太保景子詔曰君民建國教學爲先移風易俗必自茲始而言絕義乖多歷年代進德脩業其道寢微漢採坑焚之餘不絕

如線晉承板蕩之運掃地將盡自時厥後軍國多虞雖復黷宇時建示同愛禮函丈或陳殆爲虛器遂使紆青拖紫非以學優製錦操刀類多牆面上陵下替網維靡立雅缺道消實由於此朕纂承洪緒思弘大訓將欲尊師重道用闡厥繇講信修睦敦獎名教方今宇宙平一文軌攸同十步之內必有芳草四海之中豈無竒秀諸在家及見入學者若有篤志好古耽悅典墳學行優敏堪膺時務所在採訪具以名聞即當隨

其器能擢以不次若研精經術未願進仕者可依其藝業深淺門蔭高卑雖未升朝並量準給祿庶夫恂恂善誘不日成器濟濟盈朝何遠之有其國子等學亦宜申明舊制教習生徒具爲課試之法以盡砥礪之道八月壬寅上御龍舟幸江都以左武衛大將軍郭衍爲前軍右武衛大將軍李景爲後軍文武官五品已上給樓船九品以上給黃蔑舳艫相接二百餘里冬十月已丑赦江淮已南揚州給復五年舊總管內給

復三年十一月己未以大將軍崔仲方爲禮部尚書

二年春正月辛酉東京成賜監督者各有差以大理卿梁毗爲刑部尚書丁卯遣十使并省州縣二月景戌詔尚書令楊素吏部尚書牛弘大將軍宇文愷內史侍郎虞世基禮部侍郎許善心制定輿服始備輦路及五時副車上常服皮弁十有二琪文官弁服佩玉五品已上給犢車通憶三公親王加油絡武官平巾幘袴褶三品

已上給袍襪下至胥吏服色皆有差非庶人不得戎服戌戌置都尉官三月庚午車駕發江都先是太府少卿何稠太府丞雲定興盛脩儀仗於是課州縣送羽毛百姓求捕之網羅被水陸禽獸有堪斃眊之用者殆無遺類至是而成夏四月庚戌上自伊闕陳法駕備千乘萬騎入於東京辛亥上御端門大赦免天下今年租稅癸丑以冀州刺史楊文思爲民部尚書五月甲寅金紫光祿大夫兵部尚書李通坐事免乙卯詔

曰旌表先君式存饗祀所以優禮賢能顯彰遺愛朕永鑒前脩尚想名德何嘗不興歎九原屬懷千載其自古已來賢人君子有能樹聲立德佐世匡時博利殊功有益於人者並宜營立祠宇以時致祭墳壘之處不得侵踐有司量爲條式稱朕意焉六月壬子以尚書令太子太師楊素爲司徒進封豫章王暕爲齊王秋七月癸丑以衛尉卿衛玄爲工部尚書庚申制百官不得計考增級必有德行功能灼然顯著者擢之壬

戌擢潘邸舊臣鮮于羅等二十七人官爵有差甲戌皇太子昭薨乙亥上柱國司徒楚國公楊素薨八月辛卯封皇孫倓爲燕王侗爲越王侑爲代王九月乙丑立秦孝王俊子浩爲秦王冬十月戊子以靈州刺史段文振爲兵部尚書十一月庚寅詔曰前代帝王因時創業君民建國禮尊南面而歷運推移年世永久丘壟殘毀樵牧相趨塋兆堙蕪封樹莫辨興言淪滅有愴于懷自古已來帝王陵墓可給隨近十戶蠲其雜

役以供守視

三年春正月癸亥勅并州逆黨已流配而逃亡者所獲之處即宜斬決景子長星竟天出於東壁二旬而止是月武陽郡上言河水清二月己丑彗星見於奎掃文昌歷大陵五車北河入太微掃帝坐前後百餘日而止三月辛亥車駕還京師壬子以大將軍姚辯爲左屯衛將軍癸丑遣羽騎尉朱寬使於流求國乙卯河間王弘薨夏四月庚辰詔曰古者帝王觀風問俗皆所以

憂勤兆庶安集遐荒自蕃夷內附未遑親撫山東經亂須加存卹今欲安集河北巡省趙魏所司依式甲申頒律令大赦天下關內給復三年壬辰改州爲郡改度量權衡並依古式改上柱國已下官爲大夫甲午詔曰天下之重非獨治所安帝王之功豈一士之畧自古明君哲后立政經邦何嘗不選賢與能收採幽滯周稱多士漢號得人常想前風載懷欽佇朕負宸夙興寘旒待旦引領巖谷寘以周行冀與群才共康庶

績而彙茅寂寞投竿罕至豈讓美韜采未值良
工將介石在懷確乎難拔永鑒前哲憮然興歎
凡厥在位譬諸股肱若濟巨川義同舟楫豈得
保茲寵祿晦爾所知優游卒歲甚非謂也祈大
夫之舉善良史以爲至公臧文仲之蔽賢尼父
譏其竊位求諸往古非無褒貶宜思進善用匡
寡薄夫孝弟有聞人倫之本德行敦厚立身之
基或節義可稱或操履清潔所以激貪厲俗有
益風化強毅正直執憲不撓學業優敏文才美

秀並爲廊廟之用實乃瑚璉之資才堪將略則
拔之以禦侮膂力驍壯則任之以瓜牙爰及一
藝可取亦宜採錄衆善畢舉與時無棄以此求
治庶幾非遠文武有職事者五品已上宜依令
十科舉人有一於此不必求備朕當待以不次
隨才升擢其見任九品已上官者不在舉送之
限景申車駕北巡狩丁酉以刑部尚書宇文弼
爲禮部尚書戊戌勅百司不得踐暴禾稼其有
須開爲路者有司計地所收即以近倉酬賜務

從優厚巳亥次赤岸澤以太牢祭故太師李穆墓五月丁巳突厥啓民可汗遣子拓特勒來朝戊午發河北十餘郡丁男鑿太行山達于并州以通馳道景寅啓民可汗遣其兄子毗黎伽特勒來朝辛未啓民可汗遣使請自入塞奉迎輿駕上不許癸酉有星孛于文昌上將星皆動搖六月辛巳獵於連谷丁亥詔曰聿追孝饗德莫至焉崇建寢廟禮之大者然則質文異代損益殊時學滅坑焚經典散逸憲章湮墜廟堂制度

師說不同所以世數多少莫能是正連室異宮亦無準定朕獲奉祖宗欽承景業永惟嚴配思隆大典於是詢謀右位博訪儒術咸以爲高祖文皇帝受天明命奄有區夏拯羣飛於四海革凋敝於百王恤獄緩刑生靈皆遂其性輕徭薄賦比屋各安其業恢夷宇宙混壹車書東漸西被無思不服南征北怨俱荷來蘇駕毳乘風歷代所弗至辮髮左衽聲教所罕及莫不厥角關塞頓顙闕庭譯靡絕時書無虛月韜戈偃武天

下晏如嘉瑞休徵表裏禔福猗歟偉歟無得而名者也朕又聞之德厚者流光治辨者禮縟是以周之文武漢之高光其典章特立謚號斯重豈非緣情稱述即崇顯之義乎高祖文皇帝宜別建廟宇以彰巍巍之德仍遵月祭用表蒸蒸之懷有司以時創造務合典制又名位旣殊禮亦異等天子七廟事著前經諸侯二昭義有差降故其以多爲貴王者之禮今可依用貽厥後昆戊子次榆林郡丁酉啓民可汗來朝己亥吐

谷渾高昌並遣使貢方物甲辰上御北樓觀漁于河以宴百寮秋七月辛亥啓民可汗上表請變服襲冠帶詔啓民贊拜不名位在諸侯王上甲寅上於郡城東御大帳其下備儀衛建旌旗宴啓民及其部落三千五百人奏百戲之樂賜啓民及其部落各有差景子殺光祿大夫賀若弼禮部尚書宇文弼太常卿高頴尚書左僕射蘇威坐事免發丁男百餘萬築長城西距榆林東至紫河一旬而罷死者十五六八月壬午車

駕發榆林乙酉啓民飾廬清道以候乘輿帝幸其帳啓民奉觴上壽宴賜極厚上謂高麗使者曰歸語爾王當早來朝見不然者吾與啓民巡彼土矣皇后亦幸義城公主帳己丑啓民可汗歸蕃癸巳入樓煩關壬寅次太原詔營晉陽宮九月己未次濟源幸御史大夫張衡宅宴享極歡己巳至于東都壬申以齊王暕爲河南尹開府儀同三司癸酉以民部尚書楊文思爲納言四年春正月乙巳詔發河北諸郡男女百餘萬

開永濟渠引沁水南達于河北通涿郡庚戌百寮大射於允武殿丁卯賜城內居民米各十石壬申以太府卿元壽爲內史令鴻臚卿楊玄感爲禮部尚書癸酉以工部尚書衛玄爲右候衛大將軍大理卿長孫熾爲民部尚書二月己卯遣司朝謁者崔毅使突厥處羅致汗血馬三月辛酉以將作大匠宇文愷爲工部尚書壬戌百濟倭赤土迦羅舍國並遣使貢方物乙丑車駕幸五原因出塞巡長城景寅遣屯田主事常駿

使赤土致羅罽夏四月景午以離石之汾源臨
泉鴈門之秀容爲樓煩郡起汾陽宮癸丑以河
內太守張定和爲左屯衛大將軍乙卯詔曰突
厥意利珍豆啓民可汗率領部落保附關塞遵
奉朝化思改戎俗頻入謁覲屢有陳請以氈牆
毳幕事窮荒陋上棟下宇願同比屋誠心懇切
朕之所重宜於萬壽戍置城造屋其帷帳牀褥
已上隨事量給務從優厚稱朕意焉五月壬申
蜀郡獲三足烏張掖獲玄狐各一秋七月辛巳

發丁男二十餘萬築長城自榆林谷而東乙未
左翊衛大將軍宇文述破吐谷渾於曼頭赤水
八月辛酉親祠恒岳河北道郡守畢集大赦天
下車駕所經郡縣免一年租調九月辛未徵天
下鷹師悉集東京至者萬餘人戊寅彗星出於
五車掃文昌至房而滅辛巳詔免長城役者一
年租賦冬十月景午詔曰先師尼父聖德在躬
誕發天縱之資憲章文武之道命世膺期蘊茲
素王而頽山之歎忽踰於千祀盛德之美不存

於百代永惟懿範宜有優崇可立孔子後爲紹
聖侯有司求其苗裔錄以申上辛亥詔曰昔周
王下車首封唐虞之胤漢帝承曆亦命殷周之
後皆所以褒立先代憲章在昔朕嗣膺景業傍
求雅訓有一弘益欽若令典以爲周兼夏殷文
質大備漢有天下下車書混一魏晉公襲風流未
遠並宜立後以存繼絕之義有司可求其胄緒
列聞乙卯頒新式於天下

五年春正月景子改東京爲東都癸未詔天下

均田戊子上自東都還京師己丑制民間鐵義
搭鈎積刃之類皆禁絕之太守每歲密上屬官
景迹二月戊戌次于闕鄉詔祭古帝王陵及開
皇功臣墓庚子制魏周官不得爲蔭辛丑赤土
國遣使貢方物戊申車駕至京師景辰宴耆舊
四百人於武德殿頒賜各有差己未上御崇德
殿之西院愀然不悅顧謂左右曰此先帝之所
居實用增感情所未安宜於此院之西別營一
殿壬戌制父母聽隨子之官三月己巳車駕西

巡河右庚午有司言武功男子史永遵與從父
昆弟同居上嘉之賜物一百段米二百石表其
門閭乙亥幸扶風舊宅夏四月己亥大獵於隴
西壬寅高昌吐谷渾伊吾並遣使來朝乙巳次
狄道党項羌來貢方物癸亥出臨津關渡黃河
至西平陳兵講武五月乙亥上大獵於拔延山
長圍周亘二千里庚辰入長寧谷壬午度星嶺
甲申宴群臣於金山之上景戌梁浩豐御馬度
而橋壞斬朝散大夫黃亘及督役者九人吐谷

渾主率衆保覆素川帝分命內史元壽南屯金
山兵部尚書段文振北屯雪山太僕卿楊義臣
東屯琵琶峽將軍張壽西屯泥嶺四面圍之渾
主伏允以數十騎遁出遣其名王詐稱伏允保
車我真山壬辰詔右屯衛大將軍張定和往捕
之定和挺身挑戰爲賊所殺亞將柳武建擊破
之斬首數百級甲午其仙頭王被圍窮蹙率男
女十餘萬口來降六月丁酉遣左光祿大夫梁
默右翊衛將軍李瓊等追渾主皆遇賊死之癸

卯經大斗拔谷山路隘險魚貫而出風霰晦冥
與從官相失士卒凍死者太半景午次張掖辛
亥詔諸郡學業該通才藝優洽膂力驍壯超絕
等倫在官勤奮堪理政事立性正直不避強禦
四科舉人壬子高昌王麴伯雅來朝伊吾吐屯
設等獻西域數千里之地上大悅癸丑置西海
河源鄯普且末等四郡景辰上御觀風行殿盛
陳文物奏九部樂設魚龍曼延宴高昌王吐屯
設於殿上以寵異之其蠻夷陪列者三十餘國

戊午大赦天下開皇已來流配悉放還鄉晉陽
逆黨不在此例隴右諸郡給復一年行經之所
給復二年秋七月丁卯置馬牧於青海渚中以
求龍種無效而止九月癸未車駕入長安冬十
月癸亥詔曰優德尚齒載之典訓尊事乞言義
彰膠序鬻熊爲師取非筋力方叔元老克壯其
猷朕永言稽古用求至治是以厖眉黃髮更令
收叙務簡秩優無虧藥膳庶等卧治佇其弘益
今歲耆老赴集者可於近郡處置年七十以上

疾患沉滯不堪居職即給賜帛送還本郡其官
至七品已上者量給廩以終厥身十一月景子
車駕幸東都

六年春正月癸亥朔旦有盜數十人皆素冠練
衣焚香持華自稱彌勒佛入自建國門監門者
皆稽首既而奪衛士仗將爲亂齊王暕遇而斬
之於是都下大索與相連坐者千餘家丁丑角
抵大戲於端門街天下奇伎異藝畢集終月而
罷帝數微服往觀之己丑倭國遣使貢方物二

月乙巳武賁郎將陳稜朝請大夫張鎮州擊流
求破之獻俘萬七千口頒賜百官乙卯詔曰夫
帝圖草創王業艱難咸仗股肱叶同心德用能
拯厥頽運克膺大寶然後疇庸茂賞開國承家
誓以山河傳之不朽近代喪亂四海未一茅土
妄假名實相乖歷茲永久莫能懲革皇運之初
百度伊始猶循舊貫未暇改作今天下交泰文
軌攸同宜率遵先典永垂大訓自今已後唯有
功勳乃得賜封仍令子孫承襲景辰改封安德

王雄爲觀王河間王子慶爲郇王庚申徵魏齊
周陳樂人悉配太常三月癸亥幸江都宮甲子
以鴻臚卿史祥爲左驍衛大將軍夏四月丁未
宴江淮已南父老頒賜各有差六月辛卯室韋
赤土並遣使貢方物壬辰鴈門賊帥尉文通聚
衆三千保於莫壁谷遣鷹揚楊伯泉擊破之甲
寅制江都太守秩同京尹冬十月壬申刑部尚
書梁毗卒壬子民部尚書銀青光祿大夫長孫
熾卒十二月己未左光祿大夫吏部尚書牛弘

卒辛酉朱崖人王萬昌舉兵作亂遣隴西太守
韓洪討平之

七年春正月壬寅左武衛大將軍光祿大夫真
定侯郭衍卒二月己未上升釣臺臨楊子津大
宴百寮頒賜各有差庚申百濟遣使朝貢乙亥
上自江都御龍舟入通濟渠遂幸于涿郡壬午
詔曰武有七德先之以安民政有六本興之以
教義高麗高元虧失藩禮將欲問罪遼左恢宣
勝略雖懷伐國仍事省方今往涿郡巡撫民俗

其河北諸郡及山西山東年九十已上者版授
太守八十者授縣令三月丁亥右光祿大夫左
屯衛大將軍姚辯卒夏四月庚午至涿郡之臨
朔宮五月戊子以武威太守樊子蓋爲民部尚
書秋大水山東河南漂沒三十餘郡民相賣爲
奴婢冬十月乙卯底柱山崩偃河逆流數十里
戊午以東平太守吐萬緒爲左屯衛大將軍十
二月己未西面突厥處羅多利可汗來朝上大
悅接以殊禮于時遼東戰士及餽運者填咽於
道晝夜不絕苦役者始爲羣盜甲子勅都尉鷹
揚與郡縣相知追捕隨獲斬決之

帝紀第三

隋書三

帝紀第四

隋書四

煬帝下

特進臣魏徵

上

八年春正月辛巳大軍集于涿郡以兵部尚書
段文振為左候衛大將軍壬午下詔曰天地大
德降繁霜於秋令聖哲至仁著甲兵於刑典故
知造化之有肅殺義在無私帝王之用干戈蓋
非獲已版泉丹浦莫匪龔行取亂覆昏咸由順
動况乎甘野誓師夏開承大禹之業商郊問罪

周發成文王之志永監前載屬當朕躬粵我有
隋誕膺靈命兼三才而建極一六合而爲家提
封所漸細柳盤桃之外聲教爰暨紫舌黃枝之
域遠至邇安罔不和會功成治定於是乎在而
高麗小醜迷昏不恭崇聚勃碣之間荐食遼獫
之境雖復漢魏誅戮巢窟暫傾亂離多阻種落
還集萃川藪於往代播實敏示以迄今睠彼華壤
翦爲夷類歷年永久惡稔旣盈天道禍淫亡徵
已兆亂常敗德非可勝圖掩慝懷姦唯日不足

移告之嚴未嘗面受朝覲之禮莫肯躬親誘納
亡叛不知紀極充斥邊陲亟勞烽候關柝以之
不靜生人爲之廢業在昔薄伐已漏天網旣緩
前禽之戮未即後服之誅曾不懷恩翻爲長惡
乃兼契丹之黨虔劉海戍習韎鞞之服侵軼遼
西又青丘之表咸修職貢碧海之濱同稟正朔
遂復攸攘琛賫遏絕往來虐及弗辜誠而遇禍
輜軒奉使爰暨海東旌節所次途經藩境而擁
塞道路拒絕王人無事君之心豈爲臣之禮此

而可忍孰不可容且法令苛酷賦歛煩重強臣
豪族咸執國鈞朋黨比周以之成俗賄貨如市
冤枉莫申重以仍歲災凶比屋饑饉兵戈不息
徭役無期力竭轉輸身填溝壑百姓愁苦爰誰
適從境內哀惶不勝其弊迴首面內各懷性命
之圖黃髮稚齒咸興酷毒之歎省俗觀風爰屆
幽朔弔人問罪無俟再駕於是親揔六師用申
九伐拯厥阡危協從天意殄茲逋穢克嗣先謨
令宜授律啓行分麾屆路掩勃澣而雷震歷夫

餘以電掃比戈按甲誓旅而後行三令五申必
勝而後戰左第一軍可鏤方道第二軍可長岑
道第三軍可海冥道第四軍可蓋馬道第五軍
可建安道第六軍可南蘇道第七軍可遼東道
第八軍可玄菟道第九軍可扶餘道第十軍可
朝鮮道第十一軍可沃沮道第十二軍可樂浪
道右第一軍可黏蟬道第二軍可含資道第三
軍可渾彌道第四軍可臨屯道第五軍可候城
道第六軍可提奚道第七軍可踏頓道第八軍

可肅慎道第九軍可碣石道第十軍可東曉道
第十一軍可帶方道第十二軍可襄平道凡此
衆軍先奉廟略絡繹引途總集平壤莫非如豺
如貔之勇百戰百勝之雄顧眄則山岳傾頽叱
吒則風雲騰鬱心德攸同爪牙斯在朕躬馭元
戎爲其節度涉遼而東循海之右解倒懸於遐
裔問疾苦於遺黎其外輕齎遊闕隨機赴響卷
甲銜枚出其不意又滄海道軍舟艦千里高颿
電逝巨艦雲飛橫斷沮江逕造平壤島嶼之望

斯絕坎井之路已窮其餘被髮左衽之人控弦
待發微盧彭濮之旅不謀同辭杖順臨逆人百
其勇以此衆戰勢等摧枯然則王者之師義存
止殺聖人之教必也勝殘天罰有罪本在元惡
人之多僻脅從罔治若高元泥首轅門自歸司
寇即宜解縛焚櫬弘之以恩其餘臣人歸朝奉
順咸加慰撫各安生業隨才任用無隔夷夏營
壘所次務在整肅芻蕘有禁秋毫勿犯布以恩
宥喻以禍福若其同惡相濟抗拒官軍國有常

刑俾無遺類明加曉示稱朕意焉揔一百一十三萬三千八百號二百萬其餽運者倍之癸未第一軍發終四十日引師乃盡旌旗亘千里近古出師之盛未之有也乙未以右候衛大將軍衛玄爲刑部尚書甲辰內史令元壽卒二月甲寅詔曰朕觀風燕裔問罪遼濱文武叶力爪牙思奮莫不執銳勤王捨家從役罕蓄倉廩之資兼損播殖之務朕所以夕惕愀然慮其匱乏雖復素飽之衆情在忘私悅使之人宜從其厚諸

行從一品以下飲飛募人以上家口郡縣宜數存問若有糧食乏少皆宜賑給或雖有田疇貧弱不能自耕種可於多丁富室勸課相助使夫居者有歛積之豐行役無顧後之慮壬戌司空京兆尹光祿大夫觀王雄薨三月辛卯兵部尚書左候衛大將軍段文振卒癸巳上御師甲午臨戎於遼水橋戍大軍爲賊所拒不果濟右屯衛大將軍左光祿大夫麥鐵杖武賁郎將錢士雄孟金义等皆死之甲午車駕度遼大戰于

東岸擊賊破之進圍遼東乙未大頓見二大鳥
高丈餘皜身朱足遊泳自若上異之命工圖寫
并立銘頌五月壬午納言楊達卒于時諸將各
奉旨不敢越機既而高麗各城守攻之不下六
月己未幸遼東責怒諸將止城西數里御六合
城七月壬寅宇文述等敗績于薩水右屯衛將
軍薛世雄死之九軍並陷將帥奔還亡者二千
餘騎癸卯班師九月庚辰上至東都已丑詔曰
軍國異容文武殊用匡危拯難則霸德攸興化

人成俗則王道斯貴時方撥亂屠販可以登朝
世屬隆平經術然後升仕豐都爰肇儒服無預
于周行建武之朝功臣不參於吏職自三方未
一四海交爭不遑文教唯尚武功設官分職罕
以才授班朝治人乃由勲叙莫非拔足行陣出
自勇夫數學之道既所不習政事之方故亦無
取是非暗于在己威福專于下吏貪冒貨賄不
知紀極蠹政害民實由於此自今已後諸授勲
官者並不得回授文武職事庶遵彼更張取類

於調瑟求諸名製不傷于美錦若吏部輒擬用者御史即宜糾彈冬十月甲寅工部尚書宇文愷卒十一月己卯以宗女華容公主嫁于高昌王辛巳光祿大夫韓壽卒甲申敗將宇文述于仲文等並除名爲民斬尚書右丞劉士龍以謝天下是歲大旱疫人多死山東尤甚密詔江淮南諸郡閱視民間童女姿質端麗者每歲貢之九年春正月丁丑徵天下兵募民爲驍果集于涿郡壬午賊帥杜彥冰王潤等陷平原郡大掠而去辛卯置折衝果毅武勇雄武等郎將官以領驍果乙未平原李德逸聚衆數萬稱阿舅賊劫掠山東靈武白榆妄稱奴賊劫掠牧馬北連突厥隴右多被其患遣將軍范貴討之連年不能尅戊戌大赦己亥遣代王侑刑部尚書衛玄鎮京師辛丑以右驍騎將軍李渾爲右驍衛大將軍二月己未濟北人韓進洛聚衆數萬爲羣盜壬午復宇文述等官爵又徵兵討高麗三月景子濟陰人孟海公起兵爲盜衆至數萬丁丑

發丁男十萬城大興戊寅幸遼東以越王侗民部尚書樊子蓋留守東都庚子北海人郭方頂聚徒爲盜自號盧公衆至三萬攻陷郡城大掠而去夏四月庚午車駕度遼壬申遣宇文述楊義臣趣平壤五月丁丑熒惑入南斗己卯濟北人甄寶車聚衆萬餘寇掠城邑六月乙巳禮部尚書楊玄感反於黎陽景辰玄感逼東都河南贊務裴弘策拒之反爲賊所敗戊辰兵部侍郎斛斯政奔于高麗庚午上班師高麗犯後軍勅

右武衛大將軍李景爲後拒遣左翊衛大將軍宇文述左候衛將軍屈突通等馳傳發兵以討玄感秋七月己卯令所在發人城縣府驛癸未餘杭人劉元進舉兵反衆至數萬八月壬寅左翊衛大將軍宇文述等破楊玄感於閭鄉斬之餘黨悉平癸卯吳人朱爨晉陵人管崇擁衆十萬餘自稱將軍寇江左甲辰制驍果之家蠲免賦役丁未詔郡縣城去道過五里已上者徙就之戊申制盜賊籍沒其家乙卯賊帥陳瑱等衆

三萬攻陷信安郡辛酉司農卿光祿大夫葛國
公趙元淑以罪伏誅九月己卯濟陰人吳海流
東海人彭孝才並舉兵爲盜衆數萬庚辰賊帥
梁慧尚率衆四萬陷蒼梧郡甲午車駕次上谷
以供費不給上大怒免太守虞荷等官丁酉東
陽人李三兒向但子舉兵作亂衆至萬餘閏月
己巳幸博陵庚午上謂侍臣曰朕昔從先朝周
旋於此年甫八歲日月不居倏經三紀追惟平
昔不可復希言未卒流涕嗚咽侍衛者皆泣下

沾襟冬十月丁丑賊帥呂明星率衆數千圍東
郡武賁郎將費青奴擊斬之乙酉詔曰博陵昔
爲定州地居衝要先皇歷試所基王化斯遠故
以道冠函風義高姚邑朕巡撫庶爰屆茲邦
瞻望郊廛緬懷敬止思所以宣播德澤覃被下
人崇紀顯號式光令緒可改博陵爲高陽郡授
境內死罪已下給復一年於是召高祖時故吏
皆量材授職壬辰以納言蘇威爲開府儀同三
司朱爕管崇推劉元進爲天子遣將軍吐萬緒

魚俱羅討之連年不能尅齊人孟讓王薄等衆
十餘萬據長白山攻剽諸郡清河賊張金稱衆
數萬渤海賊帥格謙自號燕王孫宣雅自號齊
王衆各十萬山東苦之丁亥以右候衛將軍郭
榮爲右候衛大將軍十一月己酉右候衛將軍
馮孝慈討張金稱於清河反爲所敗孝慈死之
十二月甲申車裂玄感弟朝請大夫積善及黨
與十餘人仍焚而揚之丁亥扶風人向海明舉
兵作亂稱皇帝建元白烏遣太僕卿楊義臣擊

破之

十年春正月甲寅以宗女爲信義公主嫁於突
厥曷娑那可汗二月辛未詔百寮講伐高麗數
日無敢言者戊子詔曰竭力王役致身戎事成
由狗義莫匪勤誠委命草澤棄骸原野興言念
之每懷愍惻往年出車問罪將屆遼濱廟筭勝
略具有進止而諒愾凶罔識成敗高頰悞狠本
無智謀臨三軍猶兒戲視人命如草芥不遵成
規坐貽撓退遂令死亡者衆不及埋藏今宜遣

使人分道收葬設祭於遼西郡立道場一所恩
加泉壤庶弭窮魂之寃澤及枯骨用弘仁者之
惠辛卯詔曰黃帝五十二戰成湯二十七征方
乃德施諸侯令行天下盧芳小盜漢祖尚且親
戎隗囂餘燼光武猶自登隴豈不欲除暴止戈
勞而後逸者哉朕纂成寶業君臨天下日月所
照風雨所沾孰非我臣獨隔聲教蕞爾高麗僻
居荒表鴟張狼噬侮慢不恭抄竊我邊陲侵祿
我城鎮是以去歲出軍問罪遼碣殪長蛇於玄

菟戮封豕於襄平扶餘衆軍風馳電逝追奔逐
北徑踰沮水滄海舟楫衝賊腹心焚其城郭汗
其宮室高元伏鑕泥首送款軍門尋請入朝歸
罪司寇朕以許其改過乃詔班師而長惡不悛
宴安鴆毒此而可忍孰不可容便可分命六師
百道俱進朕當親執武節臨御諸軍秣馬九都
觀兵遼水順天誅於海外救窮民於倒懸征伐
以正之明德以誅之止除元惡餘無所問若有
識存亡之分悟安危之機翻然北首自求多福

必其同惡相濟抗拒王師若火燎原刑茲無赦
有司便宜宣布咸使知聞丁酉扶風人唐弼舉
兵反衆十萬推李弘爲天子自稱唐王三月壬
子行幸涿郡癸亥次臨渝宮親御戎服禡祭黃
帝斬叛軍者以釁鼓夏四月辛未彭城賊張大
彪聚衆數萬保懸薄山爲盜遣榆林太守董純
擊破斬之甲午車駕次北平五月庚子詔舉郡
孝悌廉潔各十人壬寅賊帥宋世謨陷琅邪郡
庚申延安人劉迦論舉兵反自稱皇王建元大

世六月辛未賊帥鄭文雅林寶護等衆三萬陷
建安郡太守楊景祥死之秋七月癸丑車駕次
懷遠鎮乙卯曹國遣使貢方物甲子高麗遣使
請降囚送斛斯政上大悅八月己巳班師庚午
右衛大將軍左光祿大夫鄭榮卒冬十月丁卯
上至東都已丑還京師十一月景申支解斛斯
政於金光門外乙巳有事於南郊己酉賊帥司
馬長安破長平郡乙卯離石胡劉苗王舉兵反
自稱天子以其第六兒爲永安王衆至數萬將

軍潘長文討之不能尅是月賊帥王德仁擁衆數萬保林慮山爲盜十二月壬申上如東都其日大赦天下戊子入東都庚寅賊帥孟讓衆十餘萬據都梁宮遣江都郡丞王世充擊破之盡虜其衆

十一年春正月甲午朔大宴百寮突厥新羅靺鞨畢大辭訶咄傳越烏那曷波臘吐火羅俱慮建忽論靺鞨訶多沛汗龜茲踈勒于闐安國曹國何國穆國畢衣密失范延伽折契丹等國並

遣使朝貢戊戌武貴郎將高建毗破賊帥顏宣政於齊郡虜男女數千口乙卯大會蠻夷設魚龍曼延之樂頒賜各有差二月戊辰賊帥楊

緒率衆萬餘攻北平滑公李景破斬之庚午詔曰設險守國著自前經重門禦暴事彰往策所以宅土寧邦禁邪固本而近代戰爭居人散逸田疇無伍郭郭不修遂使遊惰實繁寇歎未息今天下平一海內晏如宜令人悉城居田隨近給使強弱相容力役兼濟穿窬無所厝其姦宄

隋書卷四
十三
崔蒲不得聚其逋逃有司具爲事條務令得所
景子上谷人王須拔反自稱漫天王國號燕賊
帥魏刀兒自稱歷山飛衆各十餘萬北連突厥
南寇趙五月丁酉殺右驍衛大將軍光祿大夫
郟公李渾將作監光祿大夫李敏並族滅其家
癸卯賊帥司馬長安破西河郡己酉幸太原避
暑汾陽宮秋七月己亥淮南人張起緒舉兵爲
盜衆至三萬辛丑光祿大夫右禦衛大將軍張
壽卒八月乙丑巡北塞戊辰突厥始畢可汗率

騎數十萬謀襲乘輿義城公主遣使告變壬申
車駕馳幸鴈門癸酉突厥圍城官軍頻戰不利
上大懼欲率精騎潰圍而出民部尚書樊子蓋
固諫乃止齊王暕以後軍保于崞縣甲申詔天
下諸郡募兵於是守令各來赴難九月甲辰突
厥解圍而去丁未曲赦太原鴈門郡死罪已下
冬十月壬戌上至于東都丁卯彭城人魏麒麟
聚衆萬餘爲盜寇魯郡壬申賊帥盧明月聚衆
十餘萬寇陳汝間東海賊帥李子通擁衆度淮

自號楚王建元 政寇江都十一月乙卯賊帥
王須拔破高陽郡十二月戊寅有大流星如斛
墜明月營破其衝車庚辰詔民部尚書樊子蓋
發關中兵討絳郡賊敬盤陀柴保昌等經年不
能尅譙郡人朱粲擁衆數十萬寇荆襄僭稱楚
帝建元昌達漢南諸郡多爲所陷焉

十二年春正月甲午鴈門人翟松栢起兵於靈
丘衆至數萬轉攻傍縣二月己未真臘國遣使
貢方物甲子夜有二大鳥似鷗飛入大業殿止

于御幄至明而去癸亥東海賊盧公暹率衆萬
餘保于蒼山夏四月丁巳顯陽門災癸亥魏刀
兒所部將甄翟兒復號歷山飛衆十萬轉寇太
原將軍潘長文討之反爲所敗長文死之五月
景戌朔日有蝕之旣癸巳大流星墮于吳郡爲
石壬午上於景華宮徵求螢火得數斛夜出遊
山放之光徧巖谷秋七月壬戌民部尚書光祿
大夫濟北公樊子蓋卒甲子幸江都宮以越王
侗光祿大夫段達太府卿元文都檢校民部尚

書韋津右武衛將軍皇甫無逸右司郎盧楚等
摠留後事奉信郎崔民象以盜賊充斥於建國
門上表諫不宜巡幸上大怒先解其頤乃斬之
戊辰馮翊人孫華自號摠管舉兵爲盜高涼通
守沈瑤徹舉兵作亂嶺南溪洞多應之己巳熒
惑守羽林月餘乃退車駕次汜水奉信郎王愛
仁以盜賊日盛諫上請還西京上怒斬之而行
八月乙巳賊帥趙萬海衆數十萬自恒山寇高
陽壬子有大流星如斗出王良閣道聲如墮牆

癸丑大流星如甕出羽林九月丁酉東海人杜
伏威揚州沈覓敵等作亂衆至數萬右禦衛將
軍陳稜擊破之戊午有二枉矢出北斗魁委曲
蛇形注于南斗壬戌安定人荔非世雄殺臨涇
令舉兵作亂自號將軍冬十月己丑開府儀同
三司左翊衛大將軍光祿大夫許公宇文述薨
十二月癸未鄱陽賊操天成舉兵反自號元興
王建元始興攻陷豫章郡乙酉以右翊衛大將
軍來護兒爲開府儀同三司行左翊衛大將軍

壬辰鄆陽人林士弘自稱皇帝國號楚建元太平攻陷九江廬陵郡唐公破甄翟兒於西河虜男女數千口

十三年春正月壬子齊郡賊杜伏威率衆度淮攻陷歷陽郡景辰勃海賊竇建德設壇於河間之樂壽自稱長樂王建元丁丑辛巳賊帥徐圓朗率衆數千破東平郡弘化人到介成聚衆萬餘人爲盜傍郡苦之二月壬午朔方人梁師都殺郡丞唐世宗據郡反自稱大丞相遣銀青光

祿大夫張世隆擊之反爲所敗戊子賊帥王子英破上谷郡己丑馬邑校尉劉武周殺太守王仁恭舉兵作亂北連突厥自稱定揚可汗庚寅賊帥李密翟讓等陷興洛倉越王侗遣武賁郎將劉長恭光祿少卿房胤擊之反爲所敗死者十五六庚子李密自號魏公稱元年開倉以振羣盜衆至數十萬河南諸郡相繼皆陷焉壬寅劉武周破武賁郎將王智辯于桑乾鎮智辯死之三月戊午廬江人張子路舉兵反遣右禦衛

將軍陳稜討平之丁丑賊帥李通德衆十萬寇廬江左屯衛將軍張鎮州擊破之夏四月癸未金城校尉薛舉率衆反自稱西秦霸王建元秦興攻陷隴右諸郡己丑賊帥孟讓夜入東都外郭燒豐都市而去癸巳李密陷迴洛東倉丁酉賊帥房憲伯陷汝陰郡是月光祿大夫裴仁基淮陽太守趙佗等並以衆叛歸李密五月辛酉夜有流星如壘瓦墜於江都甲子唐公起義師於太原景寅突厥數千寇太原唐公擊破之秋七

月壬子熒惑守積屍景辰武威人李軌舉兵反攻陷河西諸郡自稱涼王建元安樂八月辛巳唐公破武牙郎將宋老生於霍邑斬之九月己丑帝括江都人女寡婦以配從兵是月武陽郡丞元寶藏以郡叛歸李密與賊帥李文相攻陷黎陽倉彗星見於營室冬十月丁亥太原楊世洛聚衆萬餘人寇掠城邑景申羅令蕭銑以縣反鄱陽人董景珍以郡反銑於羅縣號爲梁王攻陷傍郡戊戌武賁郎將高毗敗濟北郡賊

甄寶車於嶮山十一月景辰唐公入京師辛酉
遙尊帝爲太上皇立代王侑爲帝改元義寧上
起宮丹楊將遜於江左有烏鵲來巢幄帳驅不
能止熒惑犯太微有石自江浮入于楊子日光
四散如流血上甚惡之

二年三月右屯衛將軍宇文化及武賁郎將司
馬德戡元禮監門直閣裴虔通將作少監宇文
智及武勇郎將趙行樞鷹揚郎將孟景內史舍
人元敏符璽郎李覆牛方裕千牛左右李孝本

弟孝質直長許弘仁薛世良城門郎唐奉義驛
正張愷等以驍果作亂入犯宮闈上崩于溫室
時年五十蕭后令宮人撤牀簀爲棺以埋之化
及發後右禦衛將軍陳稜奉梓宮於成象殿葬
吳公臺下發斂之始容貌若生衆咸異之大唐
平江南之後改葬雷塘初上自以藩王次不當
立每矯情飾行以釣虛名陰有奪宗之計時高
祖雅信文獻皇后而性忌妾媵一太子勇內多
嬖幸以此失愛帝後庭有子皆不育之示無私

寵取媚於后大臣用事者傾心與交中使至第無貴賤皆曲承顏色申以厚禮婢僕往來者無不稱其仁孝又常私入宮掖密謀於獻后楊素等因機構扇遂成廢立自高祖大漸暨諒闇之中烝淫無度山陵始就即事巡遊以天下承平日久士馬全盛慨然慕秦皇漢武之事乃盛治宮室窮極侈靡召募行人分使絕域諸蕃至者厚加禮賜有不恭命以兵擊之盛興屯田於玉門柳城之外課天下富戶益市武馬匹直十餘

萬富疆坐是凍餒者十家而九帝性多詭譎所幸之處不欲人知每之一所輒數道置頓四海珍羞殊味水陸必備焉求市者無遠不至郡縣官人競爲獻食豐厚者進擢踈儉者獲罪姦吏侵漁內外虛竭頭會箕歛人不聊生于時軍國多務日不暇給帝方驕怠惡聞政事冤屈不治奏請罕決又猜忌臣下無所專任朝臣有不合意者必構其罪而族滅之故高頴賀若弼先皇心膂參謀惟惺張衡李金才藩邸惟舊績著經

綸或惡其直道或奮其正議求其無形之罪加以刎頸之誅其餘事君盡禮蹇蹇匪躬無辜無罪橫受夷戮者不可勝紀政刑弛紊賄貨公行莫敢正言道路以目六軍不息百役繁興行者不歸居者失業人飢相食邑落爲墟上不之恤也東西遊幸靡有定居每以供費不給逆收數年之賦所至唯與後宮流連耽湎惟日不足招迎媵媼朝夕共肆醜言又引少年令與宮人穢亂不軌不遜以爲娛樂區宇之內盜賊蜂起劫

掠從官屠陷城邑近臣互相掩蔽隱賊數不以實對或有言賊多者輒大被詰責各求苟免上下相蒙每出師徒敗亡相繼戰士盡力必不加賞百姓無辜咸受屠戮黎庶憤怨天下土崩至於就擒而猶未之寤也

史臣曰煬帝爰在弱齡早有令聞南平吳會北却匈奴昆弟之中獨著聲績於是矯情飾貌肆厥姦回故得獻后鍾心文皇革慮天方肇亂遂登儲兩踐峻極之崇基承丕顯之休命地廣三

代威振八紘單于頓顙越裳重譯赤仄之泉流
溢于都內紅腐之粟委積於塞下負其富強之
資思逞無厭之欲狹殷周之制度尚秦漢之規
摹恃才矜已傲狠明德內懷險躁外示凝簡盛
冠服以飾其姦除諫官以掩其過淫荒無度法
令滋章教絕四維刑參五虐鋤誅骨肉屠勦忠
良受賞者莫見其功爲戮者不知其罪驕怒之
兵屢動土木之功不息頻出朔方三駕遼左旌
旗萬里徵稅百端猾吏侵漁人不堪命乃急令

暴條以擾之嚴刑峻法以臨之甲兵威武以董
之自是海內騷然無聊生矣俄而玄感肇黎陽
之亂匈奴有鴈門之圍天子方棄中土遠之楊
越姦宄乘豐強弱相陵關梁閉而不通皇輿往
而不反加之以師旅因之以饑饉流離道路轉
死溝壑十八九焉於是相聚藿蒲蝟毛而起大
則跨州連郡稱帝稱王小則千百爲羣攻城剽
邑流血成川澤死人如亂麻炊者不及折骸食
者不遑易子茫茫九土並爲麋鹿之場悻悻黔

黎俱充蛇豕之餌四方萬里簡書相續猶謂鼠
竊狗盜不足爲虞上下相蒙莫肯念亂振蜉蝣
之羽窮長夜之樂土崩魚爛貫盈惡稔普天之
下莫匪仇讎左右之人皆爲敵國終然不悟同
彼望夷遂以萬乘之尊死於一夫之手億兆靡
感恩之士九牧無勤王之師子弟同就誅夷骸
骨棄而莫掩社稷顛隕本枝殄絕自肇有書契
以迄于茲宇宙崩離生靈塗炭喪身滅國未有
若斯之甚也書曰天作孽猶可違自作孽不可
逭傳曰吉凶由人祇不妄作又曰兵猶火也不
戢將自焚觀隋室之存亡斯言信而有徵矣

帝紀第四

隋書四

帝紀第五

隋書五

恭帝

特進臣魏徵

上

恭皇帝諱侑元德太子之子也母曰韋妃性聰敏有氣度大業三年立為陳王後數載徙為代王邑萬戶及煬帝親征遼東令於京師摠留事十一年從幸晉陽拜太原太守尋鎮京師義兵入長安尊煬帝為太上皇奉帝纂業義寧元年十一月壬戌上即皇帝位於大興殿

詔曰王道喪亂天步不康古往今來代有其事屬之於朕逢此百罹彼蒼者天胡寧斯忍襁褓之歲夙遭憫凶孺子之辰太上播越興言感動實疚于懷太尉唐公膺期作宰時稱舟楫大拯橫流糾合義兵翼戴皇室與國休戚再匡區夏爰奉明詔弼予幼冲顯命光臨天威咫尺對揚尊號悼心失圖一人在遠三讓不遂僂俛南面厝身無所苟利社稷莫敢或違俯從羣議奉遵聖旨可大赦天下改大業十三年爲義寧元年

十一月十六日昧爽以前大辟罪已下皆赦除之常赦所不免者不在赦限甲子以光祿大夫大將軍太尉唐公爲假黃鉞使持節大都督內外諸軍事尚書令大丞相進封唐王景寅詔曰朕惟孺子未出深宮太上遠巡追蹤穆滿時逢多難委當尊極辭不獲免恭已臨朝若涉大川罔知所濟撫躬永歎憂心孔棘民之情僞曾未之聞王業艱難載云其易賴股肱戮力上宰賢良匡佐冲人輔其不逮軍國機務事無大小文

武設官位無貴賤憲章賞罰咸歸相府庶績其
凝責成斯屬逖聽前史茲爲典故因循仍舊非
曰徒言所存至公無爲讓德己己以唐王子隴
西公建成爲唐國世子敦煌公爲京兆尹改封
秦公元吉爲齊公食邑各萬戶太原置鎮北府
乙亥張掖康老和舉兵反十二月癸未薛舉自
稱天子寇扶風秦公爲元帥擊破之丁亥桂陽
人曹武徹舉兵反建元通聖丁酉義師擒驍衛
大將軍屈突通於閩

衆數萬乙巳賊帥

張善安陷廬江郡

二年春正月丁未詔唐王劔履上殿入朝不趨
贊拜不名加前後羽葆鼓吹壬戌將軍王世充
爲李密所敗河內通守孟善誼武賁郎將王辯
楊威劉長恭梁德董智通皆死之庚午河陽郡
尉獨孤武都降於李密三月景辰右屯衛將軍
宇文化及殺太上皇於江都宮右禦衛將軍獨
孤盛死之齊王暕趙王杲燕王倓光祿大夫開
府儀同三司行右翊衛大將軍宇文協金紫光

祿大夫內史侍郎虞世基銀青光祿大夫御史大夫裴蘊通議大夫行給事郎許善心皆遇害化及立秦王浩爲帝自稱大丞相朝士文武皆受其官爵光祿大夫宿公麥才折衝郎將朝請大夫沈光同謀討賊夜襲化及營反爲所害戊辰詔唐王備九錫之禮加璽紱遠遊冠綠綬綬位在諸侯王上唐國置丞相已下一依舊式五月乙巳朔詔唐王冕十有二旒建天子旌旗出警入蹕金根車駕備五時副車置旄頭雲罕車

儻八佾設鍾虞宮懸王后王子王女爵命之號一遵舊典戊午詔曰天禍隋國大行太上皇遇盜江都酷甚望夷豐深驪北憫予小子奄逮不訥哀號承感心情靡潰仰惟荼毒仇復靡申形影相弔罔知啓處相國唐王膺期命世扶危拯溺自北徂南東征西怨摠九合於一匡決百勝於千里糾率夷夏大庇氓黎保乂朕躬繫土是賴德侔造化功格蒼旻兆庶歸心曆數斯在屈爲人臣載違天命在昔虞夏揖讓相推苟非重

華誰堪命禹當今九服崩離三靈改卜大運去
矣請避賢路兆謀布德顧已莫能私僮命駕須
歸藩國予本代王及予而代天之所廢豈期如
是庶憑稽古之聖以誅四凶幸值惟新之恩預
充三恪雪寃耻於皇祖守禋祀爲孝孫朝聞夕
殞及泉無恨今遵故事遜於舊邸庶官羣辟改
事唐朝宜依前典趣上尊號若釋重負感泰兼
懷假手真人俾除醜逆濟濟多士明知朕意仍
勅有司凡有表奏皆不得以聞是日上遜位於

大唐以爲鄆國公武德二年夏五月崩時年十
五

史臣曰恭帝年在幼冲遭家多難一人夫德四
海土崩羣盜蜂起豺狼塞路南巢遂往流彘不
歸旣鍾百六之期躬踐數終之運謳歌有屬笙
鐘變響雖欲不遵堯舜之迹其庸可得乎

隋書卷五

隋書卷五

隋書卷五

隋書卷五

帝紀第五

隋書五

隋書卷五



